


Twelai Da Kibelo Kyakepa

 Nakusachila, Mulongo Neville. Nakusachila. Ke kintu kyawama kubwela jibiji mu Nzubo yakwa Nkambo. Amiwa kimye kyonse ngumvwa bulongo kubwela pa tabbanako, nangwa Amiwa ngyetu kwamusango byepi. Pajipo kintu kimo na mambo a kino kifulo kicheche kyakala kyo Natemwa kubwelako. Kijitu, oo, Ami... Kyajinga kitanshi kabiji kyo kyonka kipwilo kyo Naikelepo kafunga. Kabiji kimwekatu kuwama kubwela jibiji kuno. Kabiji Nayuka mba mu lolwa lukeelo lukatampe kimye juba po jikabula kusama kabiji tubaangabanga kyeya kyato kikaleka, Naketekela mba kukekala bamo kufuma ku ino tabbanako bakatanwako pa joja juba, abo ba omvewa mu Mashi a Mwanamukoko. Mbena kupembelela kyokya kimye.

² Byo Nanji kutwela mu kibaamba ponka pano, Nanji kusambakana Nyenga Arganbright kunyuma kokwa. Kabiji waji kumbulanga mba muji bantu muno batinweko ku kupwila kwa ku Kingston, abo baikle bwenyi pa kyokya kimye, kabiji Ami... aye... nanchi nji walusekelo bingi pa kwikala nabo kuno mambo ke lushimuno. Konsetu ko baji, basutuleko maboko abo, bajinga ku kupwila kwa ku Kingston mu Jamaica. Nobe, ee, kunyuma kokwa. Kijitu bulongo, akyo kiji bulongo.

³ Namona kitupa kya pa posita kya kwitang'ana kufuma kwi Oral. Naketekela mba anweba mwabijika kala mbung'eno yanji. Amiwa kechi nayukile ne, moba, kanatu keesha. Naketekela mba kukatatulwa pa sikisi, ipo nyi? Pa sikisi kufikatu ne pa fiftiini, Mulongo Roberts mu Louisville. Bino, mukaye na kumumvwa. Mulongo Roberts aye ke—ke mulunda naami wa pa muchima, kabiji ke kalume wakwa Kilishitu wakine. Kabiji Amiwa kine naketekela mba mukomvwa buwame ku mbila yanji, bufuku pa bufuku. Kabiji ke... yanji, byo a kalombelelanga bakolwa, Amiwa—Amiwa naketekela mba anweba mukamona kwenda kwa kwa Lesa, mambo naye ke mushilikale mukatampe wa lwitabilo, byo aji Mulongo Roberts, kabiji ke muntu Lesa ye abena kwingijisha bingi na bulume. Kabiji mwingilo wanji wakajila kufuma... .

⁴ Navuluka kimye kitanshi kyo Nakumenye Mulongo Roberts, wajinga mu tente wa mucheche wakosakana ku St. Louis, Missouri, kabiji Amiwa najinga... ine, Kansas City, Missouri. Kabiji Najinga mu Kansas City, Kansas, mu kibaza. Aye waikle pa kipona kya kulutwe. Pakupwisha kupwila, twayile kunyuma na kwisamba. Bandumbulwile kwi aye. Aye mwanjike kukila Amiwa byonji; Oral uji mu myaka itanshi ya ku ma foote. Kabiji nanchi aye waambile mba, “Bushe walanguluka mba Lesa wakonsha kumvwa mulombelo wami wa bakolwa nyi?”

Naambile mba, “Mulongo, Aye wakonsha kumvwa mulombelo kufuma ku muntu uji yense.” Kyawama, byooyo aile, kabiji waambile mba, “Nanchi Naya!”

⁵ Kabiji ke muntu wajimuka bingi, kabiji wafunda kufika ne ku makoleji, myaka foolo ya kuyuka milanguluko ya bantu, kabiji Amiwa kine aye ke—aye ke muntu wa maana bingi. Kabiji wafika pa kifulo kya kwikala na bamingilo ba kupaana maana, kabiji ne bintu bikwabo, kya kuuba mba inge wamba, aye—aye nishi wikilanguluka bulongo. Kabiji kine mu kepakisha nanji, Naketekela kine.

⁶ Kabiji nanchi pano Nakonsha kutemwa kupaana sawakwa mucheche pa bya ubile Nkambo mu mpwijilo ya kwikepesha icheche yajinga ku Jamaica ne ku Puerto Rico. Kyajinga kintu kyenyi kya kuuba mba Naileko, mambo lwito lwatatwile kala. Nobe byonka byayuka Leo kuno, amba awa foni. . . Kabiji mu mulungu yense, kuji ma aduleendi mampuzha ko babena kwita amba tupwile. Bino nangwa byonka byo Natemwa kumvwa lutundaiko pakuuba Amiwa ngye, natemwa kyokyo. Inge Naya mambo muntu watumenye mba ngye, nishi Naiya mujizhina ja kyokya kipwilo nangwa a kya kipamo. Inge Naya mambotu Mulongo Neville waamba amba Nafwainwa kuya, Nafwainwa kuya mu jizhina ja kwa Mulongo Neville. Natemwa kuya inge Yesu watuma, nanchi nafwainwa kuya mu Jizhina ja Nkambo Yesu, pa kuuba mba kumanye bantu.

⁷ Kabiji Nalajile pa mwanya, kabiji Najinga wakoka pacheche. Kino kipachiko, katataka nangwa kulutwe, Amiwa nkasha kino kipachiko, mambo kibena kibena kwabanya kikolomeno kyami kufika pa kipimo kyakuuba mba Amiwa kechi nakonsha ne. Nakonsha kwikala kungi kabiji nabwela. . . Twaishile juba jikwabo, Leo ne Amiwa, pepi nobe fote mailoshi, panyuma ya kwikala mu maswapu a ku Florida, kikolomeno kya kasulukile, kabiji mukachi ka fote mailoshi kuya ku Louisville kyalekele jibiji. Mulongo Banks Wood wafwainwa kwikala muno lukeelo luno. Kabiji juba jimo kasa mbena kufuma ku Kingston ne—ne Puerto Rico, ako kikolomeno ko kyajingatu bulongo; kabiji Naikijile kufuma mu ndeke, najingatu bulongo; kabiji kasa tukyangye kufika ku Jeffersonville, kyashika jibiji. Monai, ke kipachiko kuno. Ke tubishi twamisongo mu lubesha, nangwa inge ne ke Lesa, umo, ubena kweseka kufumyapo. Nanchi, Ami—Ami kechi ne kyumvwisha bulongo ne. Nalomba ne kwipuzha bimye byavula.

⁸ Bino, nangwa byonkabyo, popo Nabukiletu, kyajinga nobe fiili koloko. Kabiji mukazhi wami ne kasongwalume balajile. Kabiji Nabuukile kulubaji lwa mwanya, kabiji Namwene bantu bavula bingi bapwila pa mpuzha yabaya, kabiji Naambile kwi Billy Paul, “Twela momwa na kupana kuboba bantu bitupa bya milombelo.”

9 Kabiji aye waambile mba, “Kyawama, taata.” Mukimyetu kicheche wabwelele, ne kwaamba mba, “Kuuba mwapana bitupa bya milombelo kuboba bantu ne.” Aye waambile mba, “Mwamumona awe muntu waimana papo?”

Naambile mba, “Ee.”

10 Aye waambile mba, “Aye wajinga ku lulwe lubaji, kabiji Naambile mba, ‘Muntu yense ubena kukeba kitupa kya milombelo.’” Kabiji waambile mba, “Naji kuya na kumupa kitupa kya milombelo, aye waji kuya kuntu kungi. Kabiji pano Naile konka kwa, kabiji aye wajinga kutu kungi. Bino papo uji kwalepa kunyuma.” Waambile mba, “Amiwa kechi nakonsha kupana nangwa kitupa kimo kya milombelo ne.”

11 Naambile mba, “Kyawama, Billy, kechi usa kupana bitupa bya milombelo ne, mambo muji mpuzha yabaya bingi muno poso muntu yense wakonsha...” Bitupa bya milombelo ke bya kukanya byungwe...mwamona, kabiji ne kwibalama mu ndonda. Naambile mba, “Oo, Nakonsha kutola muntu yense uji momwa, kechi kukila pa mpuzha yonji nayo ne, kabiji kwi batatamika ne kwi balombelela umo umo.”

12 Kabiji aye waambile mba, “Kijitu bulongo.” Kabiji wazhalulukijile ku kilujo ne kuya byobyoyo aile kufuma kwi ami. Kabiji Naalulukile *bibye* kulubaji ko aijilenga mu *joja* jishinda, kabiji na mutajilenga.

13 Kabiji Naumvwine Jiwi kufuma Mwiulu, ne kwaamba mba, “Bino pa kino kimye Nsakutatula ku kutumbijika.” Kabiji Natajile, kabiji kechi Nakimwenepo jibumba javula bantu byo bya ne, baishilenga kufuma konse konse.

14 Kabiji jizhina jaji Mulongo Roberts ja ichilwe, amba, “Pano Mulongo Oral Roberts ubena kwiya na kukumona.”

Kabiji Naambile mba, “Ng’anyi lwimu Amiwa lo nsakumwimuna Mulongo Roberts?”

Waambile mba, “Monka mu jishinda jo akwimwinamo.”

15 Kyawama, Namwene Mulongo Roberts wavwala suti ufita kasa abena kwiya, kabiji ne kisochi kicheche nobe kivwalapo Bing Crosby, abya byo bachipula pacheche kabiji kasa kyakuluka, kisochi kifita kya kicheche. Kabiji Naimene bibye kasa tala peulu, kabiji aye watajile peulu ne kwaamba mba, “Alo, Mulongo Branham.”

Kabiji Naambile mba, “Alo, Mulongo Roberts,” na imwine kuboko kwanji.

Waambile mba, “Uji na jibumba jawama.”

16 Naambile mba, “Ke jibumba jabaya, Mulongo Roberts.” Kabiji aye waalulukile ne kuya monka mwaijile Billy, ku kilujo.

17 Kabiji Nalangulukile mba, “Kwepi Amiwa kosa kwikala pa kwamba nabo?” Kabiji Naesekele konse konse pakuuba

mba taane mpuzha pa kwambila. Najinga mu musango umo, kintu kimo mukachi, kyo Nabujile kumona peepi pa—pa kwambila nabo.

Kabiji muntu umo waambile mba, “Kyawama, iya kuno.”

¹⁸ Naambile mba, “Kyawama, kechi ubena kumona bulongo popo ne.” Kabiji Natatwile kukilang’anya yoya mpuzha. Kabiji Navulukile kikyepano, Naambile mba, “Kine kintu amiwa kyo nakonsha kuuba ke kwikepesha mu muchima wami, kimye kyonse, ku meso akwa Lesa ne baana Banji.”

¹⁹ Ponkapo Nafumine mu kimwesho. Kabiji Nalangulukile mba, “Kyaila muka kye? Kape kyalumbulula mba tusa kwikala na . . . Nangwa kwepi ko—kwepi ko kikekela?” Mwamona, bimye bimo, mu bimwesho, Aye kechi ubulang’ana kana kwepi ne, Aye—Aye wambatu kabiji obewa wa . . . Kiji mu kishipi, nobe. Kabiji Amiwa kine anweba mutanga Baibolo mwaumvwa kyokyo.

²⁰ Kabiji pano Naile mu kibamba kya kulutwe ne kwikala naikala pacheche, kabiji kyajinga pepi nobe afu pasiti-fiili nangwa foolo koloko mu lukeelo kelo. Naumvwine bingi tulo. Nabwelele na kulala, kabiji Nalotele kiloto, kabiji kyajinga kiloto kyapusanako bingi. Kabiji anweba bonse mwayuka umo wa ma manija, Jack Moore. Mulongo Jack Moore, Namuyuka pa myaka yavula bingi. Nalangulukile nobe Najinga kuntu kumo ko najinga na mwananji wamukazhi, songwakazhi wa myaka pepi nobe sebetiini, kabiji na mukwachile ku kuboko, kasa na mutwala ku katumbatumba, Jackie wa mucheche. Kyawama, Namuyukile kufumatu kasa a kyaamwa. Kabiji Namutangijilenga kuya ku katumbatumba, kupitaila bishimikwa bikatampe kuya ku katumbatumba, ku mutangijila yuwe songwakazhi. Kabiji twafikile mushi ya kinchi kikatampe, kabiji waikela panshi. Kabiji pamotu nobe bavula basongwakazhi ba bacheche bakitwala-myaka leelo bamvwala oa masiketi, mwayukatu, iji nobe yabaya kushi, kabiji wamvwajile umo wayewa musango wa masiketi. Kabiji watolele yuwe siketi wa mucheche ne kumusaapula kabiji waikala ne panshi. Kabiji nobe bakitwala kimye kyonse kasa babena kwitala, wafutwile maboko anji nobe *bibye* kabiji watatwile ne kutala mwiulu. Kyawama, Jackie ke songwakazhi wamuheche wawama bingi, bino wajinga na kyatunwa kikatampe bingi ne meso akatampe abaya bingi, kabiji ne suki ipomba, kechi uji na nkebwilo yabaya ne, bino kasa aji inetu muheche. Kabiji Nakonsheshe kumona meso anji abaya byo atajilenga mwiulu, kabiji jiulu ja bekwilenga mu meso anji.

²¹ Kyawama, Naile pepi nobe faivi feeti kufuma po aikele, kabiji waubile nobe walaajile mu kabavu *bibye*, kabiji watolele mupenende ne kubika mu kanwa kami, kabiji na tatwile kunyeuna yuwe mupenende. Kabiji Natatwile kulangulukapo,

“Kika kyo Mbeni kuba kuno? Kika, amiwa mwanamulume mukulumpe, na yuwe mwanyike songwakazhi. Kika,” Naambile mba, “Amiwa nasongola nji ne na baana bavula. Amiwa kechi njipo na mwingilo kuno na yuwe songwakazhi wa mucheche ne.”

²² Kabiji Natatwile kwimana. Kabiji, byo Naubile, Jiwi jaishile kufuma mu kinchi, kabiji jaambile mba, “Akye ke kya kiyukilo kabiji ke kya kintu kimo.”

²³ Ne kuubuka Nabuukile, kabiji Nashi kabijike, ke—ke kuzazhila. Nalangulukile mba, “Oo, nakumya kana kyalumbulula mba Amiwa nsakubwela panyuma nangwa kintu kimo kisa nkumwekela?” Kyawama, Nalangulukile mba, “Inge Natatula kwingijisha milanguluko yami ami mwine, nishi Nakonsha kwi bilubakanya, nanchi Amiwa pembelelatu pa Lesa.” Kabiji Natatwile kulomba. Naambile mba, “Nkambo, bushe akye kiloto kyakwatakana pamo na kyokya kimwesho kya pa kimabaanga bufuku, nangwa kyalumbulula ka?”

²⁴ Panyuma ya kupembelelako ka kimye, kapepo awala umo (Bakazhi bami kasa babuka ne kajo kakwiaula kanengezhiwa kala.), kabiji Jiwi jaishile jibiji, ne kwaamba mba, “Yanga ku Kingston, kabiji kyakuuba kikakubuulwa konka kwa.”

²⁵ Nanchi, ponkapotu Naile ku Kingston. Kabiji abo—abo bayukile Pakina mute amba Amiwa kafika kokwa Pakitanu. Ako ko kubulang’ana konka kotwajinga nako. Amiwa kechi ne wawama kufwanyikizha . . . ? . . . nangwa kwesekezha kuvula kwa bantu ne, mambo kimye kyonse Amiwa vuzha manambala. Bino bufuku butanshi, Nakonsha kwamba mba twajinga pepi nobe twelufu, oo, pepi nobe bantu twelufu aduleendi, kufuma, mambo kyayukanyikilwetu juba jimo. Kabiji jalondejilepo kwajinga bakunyema banyemenenga mailoshi foolo, kunyema kwakutambazhana, na kukajila mitumba. Umo wakunyema wanyemenenga ma awala foolo, kabiji wapana ku mukwabo unyema wakajila pa mutumba. Kabiji bufuku bwalondelapo kwajinga pepi nobe faivi sauzande. Kabiji bufuku bwa busatu kyajinga kufwanyikizha pepi nobe fifitiini sauzande, kapepo tweti. Kabiji kwajinga masauzande na masauzande baishile kwi Nkambo.

²⁶ Kabiji kimonwa kyajinga, ka kipwilo kacheche, awa songwakazhi wajinga kisungu, mwanyiketu, kabiji akya kyalumbulwile mba ke bukisungu bwa kipwilo. Kabiji abya bishimikwa bisatu bya kufika ku katumbatumba, ajinga ke moba asatu Amiwa kwingila mwingilo. Kabiji ne kusenda kipwilo kicheche kya bukisungu ku ng’ingijilo yami, kufuma po ajinga, kuya peulu mu bintu byakwa Lesa, poso kyasukenya kitulu kyonse.

²⁷ Kabiji, oo, bamwingilo ne bantu bazhokoloka, kujila ne kupopwela kabiji ne kusashijila, “Pa bufukutu bumo nangwa abiji akwabo,” aba batangijila muzhi.

28 Twafumineko kuya ku Puerto Rico. Akwa betukumenye na lukatampe, lushijilo lwa peulu, kabiji masauzande amasauzande bayujile mu kibaza, poso kufwanyikizha kwajinga pepi nobe fote sauzande myeo yanema yaishile kwi Nkambo Yesu. Kabiji pa kuya, Naketekela Nakonsha . . . Nakonsha kwamba kikye ku kipwilo kyami amiwa mwine, bino kechi Nakonsha kwi kyuba momwa movula ya bantu ne, akwa kwabula balunda, mambo bakonsha kwi kimwena mungi. Bino Amiwa njina jizhina ja mutonyi papo pa kipepala, aye wapaine byambo kimye kyo twafuminenga kokwa, ponkapo, aye ne bamwingilo banji.

29 Kabiji Na . . . Aye—aye waambile mba, “Twanemekwa bingi pa kitulu kwikala na bamwingilo bavula.” Aye waambile mba, “Kimye Mr. Billy Graham po bafumatu pa kitulu katataka,” kabiji waambile mba, “twajinga na—na kupwila kwawama bingi,” aye waambile mba, “bino Billy Graham wituletejiletu Mambo awama amo otumvwapo kimye kyonse.” Aye waambile mba, “Pano twanemekelwe kwikala na Mr. Roberts pa kitulu,” aye waambile mba, “kabiji Mr. Roberts witupele mbung’eno ya moba-asatu. Bino,” amba, “malipilo abaile bingi mu otela,” waambile mba, “washile sate-faivi sauzande mali ama dola pa mafuku asatu, kulipilatu ku otela.” Aye waambile mba, “Pano Mr. Osborn wajinga ponka, wajinga kalume mukatampe wa Kilishitu. Bino,” waambile mba, “kimye Mr. Osborn byo afumineko, kwajinga kwitulengesha buvu,” waambile mba, “kyamwekele nobe bintu byonse byaya.”

30 “Bino,” waambile mba, “twamwene mu mu kukwe kupwila mba kechi pajipo muntu nangwa umo washalapo pa pulatifomu wa kulombelela Mulongo Branham ne. Bino,” waambile mba, “kupwila byo kwapwile, twatolelenga kuyuzha motoka na bipona byakala ne mikombo kabiji ne bintu byonse, kufuma mu jibumba.” Aye waambile mba, “Kechi wajinga muntu pa kikye kimye ne, Lesa waishile kwi atweba,” byo byo aambile.

31 Naambile mba, “Kechi muketekele milombelo yami ne; pakuuba milombelo yenu momo, bikai maboko enu umo pa mukwabo.” Kabiji baletelenga kape nobe dazeni umo nangwa abiji ku pulatifomu, kabiji, inge kuyuka bapashi kwaiya, bantu bajijilengatu. Twaikela mu otela wakipimo kyabu-foolo, kabiji twalipijile atweba bene byonse kabiji ne mashinda onse, atweba bene.

32 Anweba mwakwashishe kuba kyokyo, anweba yeka, na bya bujikumi byo muntumina. Byo byaubile kikye. Kabiji Nakeba anweba mba muyuke kyokyo, mu byonse byo, anweba mwalolamo lubaji. Kabiji mu joja juba jikatampe ja lukumo jikeya, Lesa ukemufweta pakyokyo. Mwamona, anweba kechi mwajinga . . .

33 Inge muntu aye mwine waya kabiji wakooba kintu kimo, nanchi, mwamona, inge awa muntu wafumako, abo balanguluka

mba, “Wiibalengesha buvu bwabaya, Lesa witushiile.” Lesa kechi ukusha ne. Aye kimye kyonse uji nenu. Monai, ke obewa uji mukyokyo kintu byonka biji, nobe muntu yensetu. Lesa wakonsha kwingijisha muntu umo pa mwingilo umo, bino kechi kyalumbulula mba awa muntu ye ujipo na lusa pe Lesa ne. Ke lwitabilo lobe obewa mwine mwi Lesa.

³⁴ Kabiji bakonsha kuya kokwa na bikochikala byakala bya bicheche, kyakuuba mba bakonsha kusenda tubikochikala-twabana, ne—ne kulenga kipabi, kabiji balajikapo bantu ne kwi bendesha. Kabiji kupwila inge kwapwa, monse mwakunyemena mwikalala mwabula bintu, abo bayatu na bikochikala na kutola bikochikala byakala bya bicheche ne bipona byakala, kabiji mikombo ne mwakulala banyike ne myanya, kabiji bamo baya kasa bendatu panshi ne kwibasha, mambo akuuba mba Kyeenyi kya kwa Nkambo kyajingapo. Abyo byo tubena kukeba kumona. Muntu pano wafumamo mu kipikichala, Lesa ye ubena kwenda.

³⁵ Kubwela pano, kupaanatu bukwasho lukeelo luno, Amiwa nsakwambatu mu mamineti acheche. Kabiji Nakwipuzha basongwalume namba kechi bapaane tepu ne. Pa moba asatu Naesekeshatu kulanguluka kyakosa bingi, “Kika kyo Nsakusapwilapo?” Kabiji luno lukeelo, Amiwa kasa kyangye kuya, Nanji kumwa lujimuno lwa kusopesha kipwilo lwakine kine mu muchima wami. Kabiji Nanji kwibabula namba, “Sendai tepu, bino kuswisha kupotesha ne.”

³⁶ Bino kasa tukyangye kuuba kikye ne, Nasaka kupanapo kalushimuno kacheche, pakuuba mba kakonsha kwi mukwasha. Ka kwashishe ne amiwa. Twaile palwendo lwa moba-asatu na kuloba, Leo ne Gene ne amiwa mwine, kabiji mwanami Billy Paul ne bakazhi banji, ku mulunda wiya kuno ku tabbanako, kufuma ku Georgia. Kabiji betutwajile kunyuma ku bisensa, Amiwa kechi nayuka kwiine ko kyajinga ne, kwipi na Okeechobee nangwa kiji nobe byonkabyo, kechi Nayuka jizhina abo ba Seminole Indian jo batumbile ne. Bino, nangwa byonkabyo, twajinga ma mailoshi avula bingi mungye.

³⁷ Kabiji awe Mulongo Evans, mulongo wanjii ndengamambo. Kabiji aye ke funji wamasabi mukatampe, kabiji waille monka mu bisensa bang’ondo bacheche bapita kunyuma. Kabiji baji na byo batela mba “mulolo wa mu meeema.” Kabiji awa muloolo wa mu meema wamusumine, kabiji wapulukiletu pacheche. Kulu kwanji kwavimbile, kabiji bamutwajile ku madokotala ne kumwasa manguya. Abya bintu byanshita. Kabiji kuji bambambe bavula bingi konkakwa, bambambe, kwabilo, basamba balepa tweeti-feeti.

³⁸ Kabiji mu kimye kyo twalobelenga amwa monka, Nakwachile jisabi jikatampe. Oo, jajinga juba jine ja—ja kukokoloka. Kabiji wajinga wabaya bingi kechi Nakonsheshe kumufumya mu meema ne, kabiji wa olweletu kanda ne kuya

keaeeye, nangwa windooseletu aye mwine. Kabiji twajinga na masabi avula, pepi nobe aduleendi ne fifite amasabi abaya. Kabiji abo, amo apiminwenga mu mapaundi avula, kabiji kufumaku foolo kufika pa sebeni, eiti mapaundi. Kabiji Nakwachile awe umo wabaya, kabiji wapusumukile.

³⁹ Kabiji Namutaile kunyuma, kabiji Na—Nakwachile ne mukwabo, pepi nobe sikisi, sebeni paoundi. Kabiji Najinga na kisomo kyalepa akyo kyo wakonsha ku kwachijila pa mabula abikwibu. Kabiji Mulongo Evans wajinga na . . . Atweba bonse twazobebe pa kwenda mu meema, mambo misampatu. Kabiji aye wavujile sapato yanji ne kuvunga toloshi wanyi ku mikupa, kabiji waikele pa mpuzha icheche yauma, kyajinga nobe waanyikilenga byakuvwala byanji. Kabiji wamwene aje jisabi jikatampe kasa jibena kuminyangala munsono, kabiji Naendelenga pa meema kuya koaji. Aye waambile mba, “Mineti umo, Mulongo Branham, Amiwa nsakukukwachila.” Kabiji aye wanyemejileko. Kabiji Amiwa ne jikokelenga, naketekela aja jisabi jajinga pepi kwipaiwa, kasa jalala mu buchimba. Kabiji aye wanyemene kuya na kumutola. Kabiji, byo ekyubiletu, watamine muteto, ke abwele ne kubwela. Muloolo wa mu meema wamusumine.

⁴⁰ Kabiji twatajilepo, kabiji pajinga meso meso abimbo mukulu kwanji po bamusumijile ku muloolo, kabiji kyatachilenga bingi kyakuuba mba ne mipolo ke ifume mu meso anji. Waambile mba, mbena kumvwa nobe bikupa bibena kuleka kwingila. Kabiji kwajinga, ma mailoshi avula monka mwa mubisensa. Aye wajinga muntu mukulumpe pakuuba mba mu musende. Kabiji umvwe muloolo wakusuma, misongo itata bingi mu maminetitu acheche kufika ne kwipi na kufwa. Kabiji Leo wajinga ponka kasa aimana. Kabiji kintu kimo kyaishile mu milanguluko yami, “Anweba mukijitu Lesa!” Kabiji byo akwachile kulu kwanji ne kwi kukwachisha, kabiji aa meso abiji abaya a bimbo amwa mo amusumijile muloolo, Natetekelepo maboko pa yoya mpuzha ne kwaamba mba, “Nkambo, kyanembwa mu Kyambo Kyenu, ‘Bakanyata pa mitwe ya miloolo ne tuminye, kabiji kafwako nangwa kimo kikebabeleka ne.’” Kabiji ponkapotu, kukola konse kwalekele ku kulu kwanji. Wamvwala sapato yanji kabiji ne kuloba juba jonse.

⁴¹ Twabwelele bobwa bufuku kabiji ne kwibabula pa kikye, baambile mba, “Obewa kyawama kuya kwi dokotala.”

⁴² Aye waambile mba, “Inge Lesa wakinkizha kufika ne pano, Aye usakundama kulutwe konse.” Twapwishishe moba asatu, kafwako kumvwapo nangwa kimo kyatama ne.

⁴³ Lesa ukijitu Lesa. Aye ulama mulaye yense. Kabiji ng’ingijilo yami yonse, akya ke kimye kitanshi kyo Namonapo Lesa waiya pa kusumana kwa muloolo, mambo kyajinga kimye kyami kitanshi kyo Naikajilepo na kimye kya kulombelela muntu ye

basuma ku muloolo. Akye kimuyukishatu mba Aye ulama milaye Yanji yonse, kabiji Byambo Byanji byo byawama kabiji bya kine. Amena.

⁴⁴ Vulukai mpwijilo ya bufuku buno ne Pakisatu kibena kwiya. Kabiji lombelelaiko muntu umo pa kino kimye ao wakabila bingi kulombelelwa, ke amiwa. Kabiji, vulukai, mu katanweko ku mpwijilo ya Mulongo Roberts byo kukeya mu muzhi, kabiji mupaipo lwimu kufuma kuno ku tabbanako.

⁴⁵ Kasa tukyangye kutanga Kinembelo, Na—Nakonsha kutemwa atweba twaimanako pa mineti umo. Kabiji, kwakubula byombesha, twayaitu twimbe lwimbo umo nangwa ibiji ya mu yuwe lwimbo wakala wawamisha wa kipwilo, *Lwitabilo Lwami Lubena Kutala Kwi Anweba*. Kijitu bulongo, bonse tukwatakane pamo ne amiwa, kabiji twayai tumwimbe. Kabiji kechi mulanguluke byo mubena kwimba ne, mwimbilaitu kulukumo lwa kwa Lesa. Wakonsha kwitutangijila yuwe lwimbo, Mulongo Neville?

Lwitabilo lwami lubena kutala kwi Anweba,
 Anweba Mwaanamukoko wa pa Kalvali,
 Mupulushi wa bulesa;
 Pano ng'unvwai mu kimye kyo Mbena
 kulomba,
 Fumyai kuzhatwa kwami konse,
 Oo ndekai kufuma ja leelo
 Ngikale Wenu yense!
 Kimye bumi bwami kyo Bubena kwenda
 mumashinda avula afinshi,
 Kabiji bulanda bwazhokoloka,
 Anweba Ikalai Tangi wami;
 Fumyai finshi ja leelo,
 Fumyai bulanda, ne moyo,
 Nangwa kundekelela ngye mungi
 Kufuma kwi Anweba ne.

⁴⁶ Namitwe yetu ya kunama, Nakeba kutanga kufuma mu byanembwa byazhila bya mu Baibolo, Wazhila. Mateyo, kyapitala kyabu 7, maveleeshi 13 ne 14. Kabiji lekai aye Nkambo abikepo mapesho Anji anema byo tubena Kumutanga.

Twelai pa kibelo kyakepa: mambo kibelo kyabaya, ne jishinda jabaya, bitwala ku lonaiko, kabiji bayamo bo bavula.

Mambo kibelo kyakepa, ne jishinda jakepa, bitwala kubumi, kabiji bebitaana bo bacheche.

⁴⁷ Twayai tulombe. Anweba Lesa, Ao waletele jibiji Nkambo Yesu kufuma ku bafwa ne kufuma ku kilende, kabiji Aye wamupana kwi atweba lukeelo luno nobe Kitapisho kyumi, mu kwikepesha momo twapaina bumi bwetu kwi Anweba kipya kipya, na milanguluko ya kuuba mba Anweba musakwikala

betuta bingi muchima. Kasa tukijitu bandenga mambo, witufwijile pa bubi ne mizhilulwila, Anweba mwatumine Mwaanenu Yeka umo, walengwa mu musango wa mubiji wa bundenga mambo, pakuuba mba ekale ke futo ya mambo etu, amba Wabula mambo, amanamine bazhatwa, pakuuba mba etupwanye pamo mulumvwang'ano ne Anweba.

⁴⁸ Kabiji, Anweba Lesa, inge paji bubi pakachi ketu lukeelo luno, kintu kimo kyakonsha kukanya Mupashi Wazhila kubula kwituletela Mbila yakwa Lesa mu michima yetu bonse, twalomba mba, mu kwikepesha, Nkambo, Anweba tulekelaiko mizhilulwila yetu. Tutokeshai na Mashi a Nkambo Yesu. Ao. . . Twayuka, mukachi ketu, kafwapo nangwa kimo kyo tunji ne, kabiji twisolola mba kapaji byo tuji ne. Pakuuba Anweba mwi bazhila, Anweba mwi bakine, Anweba mwi baoloka, Anweba yenu Nsulo ya lusa. Kabiji twikepesha twaiya na kukalaba koko leelo, nobe myeo yapelelwa. Byonka byo twaumvwa lushimuno lwa pewa, kufuma ku Jamaica ne kufuma ku Puerto Rico, kabiji ako Anweba ko mwaingila mingilo ikatampe, Anweba Lesa, ke kiyukilo kyakwiya Awa Waoloka.

⁴⁹ Anweba Byo mwapokolwele Mulongo Evans ku oa meno abulembe bwa muloolo, mambo aye wajinga waitabila, kabiji Byambo Byenu kimye kyonse byakine. Pano, Nkambo, tupokololai ku meno alufu lukeelo luno, mulwanyi o etusumako ne kwitupa bulembe. Lekai muchi Wenu walubuko, lukeelo luno, Nkambo, ayuzhe mipashi yetu ne kwi tutokeshi ku bumbulwa koloka bonse. Bukai misongo ya mibiji ya mashi ayo yatabaulwa na bulume bwa mulwanyi. Bonse baji mu Kyeenyi Kyabulesa, lekai babukwe.

⁵⁰ Ambai kwi atweba kupichila mu Kyambo Kyenu kyanembwa, Nkambo. Kwakubula kuyuka ne bya kwamba, bino Anweba musa kwibipaana. Kabiji Anweba tujimunai, Nkambo, ne kwi tunengezha mambo a Kwiya Kwenu. Mambo twaipuzha kikyeye mwi Yesu mu Jizhina kabiji na mambo a Aye. Amena.

⁵¹ Amiwa kimye kyonse ngikalako wakelwa pacheche, mambo pano Napembelela. Kabiji sukuulu wa Pamulungu, Naketekela, wapwa. Bino pajipo kintu kimo pa kikyeye, inge Naiya ku muzhi Amiwa ng'umvwa nobe Njina kimye kyabaya bingi. Mwayuka, tubena kunyema bingi lubilo, nangwa byonkabyo. Nanchi, tusa kuketekelatu Lesa.

⁵² Nkambo Yetu wapainenga lujimuno lwakonsa bingi ku bantu ba mu kimye Kyanji, bantu bajinga bingi ba bupopweshi. Kabiji Aye waambile mba, "Twelai pakibelo kya kepa, kabiji jishinda ja kepa, jitwala ku Bumi, ne bacheche bo Bejitaana." Bino, kechi kyajinga mambo akubula bapopweshi ne. Bajinga bingi babupopweshi. Kabiji mambo ke a kuuba mba baketekejile mu kipwilo kabiji ne bya mafunjisho a kipwilo

ne madinominesheni, kabiji baketekejile (kufika pa kipimo) mwi Lesa, baketekejile mba byonse bijitu bulongo. Bino Aye wibabujilenga mba kukekalatu bacheche bakatwelamo.

⁵³ Kabiji Mbena kukumya lukeelo luno kyakuuba mba kechi nakonsha kupashang'anya kikye na kino kisemi ne. Monai, kyajinga kimye kya kupezhako nkulo ya Bayudeya, kabiji Aye watongwelenga kunyuma mu bimye byapusanapusana kabiji ne mpelo ya mankulo apusanapusana, kabiji wibabujilenga mba bintutu bimo bya ubilwe mu mankulo apita ibyo bibena kubiwa ne mukachi kaabo. Kabiji abo bakakelwe kwi kiyuka. Kabiji twayai tumone bintu bimo byo a Ambilengapo.

⁵⁴ Abo, nobe kya kumwenako, kechi baketekejile mba Lesa wajinga mu Muntu ne. Akyo kyajinga kibamba kikatampe bingi kya kuuba mba bekikanjile, kyajinga kyakuba Aye kasa anji Muntu ke ebike Ayemwine pa bu Lesa. Abo kechi bakonsheshe kumona Lesa byo akonsha kwikala mu mubiji wanyama ne mashi ne. Kabiji mu nkulo onse, mu bimye byonse, Lesa kimye kyonse wikala mu muntu. Muntu ke wamwingilo wakwa Lesa. Mu nkulo yonse, Lesa wamba ku bantu Banji kupichila mu kanwa ka muntu. Aye kimye kyonse usalapo muntu umo nangwa kintu kimo kyo Akonsha kwingijisha.

⁵⁵ Kabiji Aye wibatongwelenge, amba ke kya kwituntulako, namambo akwa Abulahama. Aye waambile, wiibambijile, "Umvwe anweba mwitela mba 'baana bakwa Abulahama' Abulahama ye 'shenu', aye wamwene juba Jami kabiji wasangalele pa kwi jimona. Abulahama, ngauzhi." Kabiji kechi kya kuzhinauka ne amba Yesu wibambijilenga mba Aye washiniikishe kwi abo amba Wajinga Mesiyasa, mambo kiyukilo kya bu Mesiyasa kya mulondejilenga Aye. Kabiji kyajingatu mu yekawa musango umo pankulo pankulo, amba, kyo kiyukilo kya bu Mesiyasa. Bino Aye ubena kwialula Ayemwine ke Lesa, Mesiyasa Ayemwine, akyo kibatuntushe. Abo kechi be kikwatakenye ne.

⁵⁶ Pano, kimye Abulahama (ye baichile mba shabo) byo asambakene Lesa, Aye naye wajinga mu mubiji, mambo Aye wajile nyama mwaana ng'ombe, wajile shinkwa wa bunga (ne kutoma mukaka) ne batala, mu kifulo kyakwa Abulahama, kabiji nangwa byonkabyo Aye wajinga Lesa. Abulahama wa Muyukile, Lesa, kabiji Wamutelele mba "Elohimu," kulumbulula mba Yehoba wa Bulumebonse. Ke Muntu wamvwala bya kuvwala, na lukungu pa Mubiji Wanji, kabiji waikele mushi ya kinchi, mambo a kifutele, ne kuja nyama kabiji ne kutoma mukaka. Nanchi aba bamunyango, michimayashita, ba kwitemwa, Bayudeya baoloka kechi ba muketekejile mba Aye ye Mwaana Lesa ne, kabiji ba mutelele Abulahama mba shabo. Kabiji Aye wibayukishenga mba Ubena kubatu bintu bimo, mu mubiji Wanji, byonka Lesa byo abulepo mu mubiji

kimye kyo Akumenye shabo, Abulahama. Kabiji Abulahama wa ketekejile. Ne abo kechi baketekejile.

⁵⁷ Mwamona, kimye Abulahama kyo aikele mutente wanji mambo aye wasalulwile, kabiji akwa kusalulula kwapewa ku muntu yense wasemekwa pano pantanda. Kinchi kya kuba byawama ne byatama kyapewa ku muntu uji yense. Kabiji kimye Lota, mwipwa wanji, ne bakafunga babo batatwile kupachika na mampuzha; Abulahama, byo ajinga muntu waoloka, wibambijile mba, “Kechi pekalepo bya kwipachika pakachi ketu ne. Anweba salululaitu jishinda ja kuyamo.” Akyo kifulo kifika mu bumi bwa yense waitabila. Kabiji kiji ku meso enu lukeelo luno, kabiji kiji ne kwi amiwa.

⁵⁸ Lota kechi walangulukile mba usakubwela munyuma ne, bino aye waile kutala ku Sodoma ako bintu ko byajinga byapeela. Kabiji bimye byavula tutala konka kujishinda japeela. “Amiwa katwela mu kipwilo kyakananga—ne kananga, kabiji, mwamona, kafwako nangwa umo ukamba kyatama pa kyokyo ne, mambo kyo kipwilo kyabaisha mu muzhi.” Jishinda japeela! Binye byavula tuba byo byo, inge, twaya mungi!

⁵⁹ Vulukai, inge mwalondela Kilishitu, bantu bakemushikwa, mambo bonse aba bekala bwikalo bwaoloka mwi Kilishitu Yesu bakamanyikwa. Kabiji inge mwaiya kwi Kilishitu, kechi mukeya kupichila mu kipwilo nangwa dinominesheni iji yonse ne, nangwa lufunjisho lwa kipwilo ne. Mukeya kupichila mu Mashi, ajo jo jonka jishinda ja kutwelelamo. Kabiji kuuba wasendapo nangwa muntu umo ne, obewa ukeyatu buke ne kwimana pa kwisolola kobe kabiji ne lwitabilo lobe. Obewa kechi ukakajila pa bakafunga ne, nangwa pa lwitabilo lu bainobe ne. Obewa ukeyatu buke bobe inge waiya kwi Lesa! Kabiji bimye byavula twikala na kusalulula kwabulamo maana.

⁶⁰ Pano i byepi Lota, byo amwene bintu byonse kwikala byapeela...? Aye wamwene mba kuji mali avula ne kuyukanyikwa, mambo a kwikala mwenyi, kabiji muntu wajimuka, wafunda, saikoloji wavula, kabiji wakonsha kubapo ne bintu bimo kabiji wabwela watwajijila mu bupopweshi bwanji. Aye walangulukile mba, “Amiwa njina lwitabilo mwi Lesa, nanchi Nsakuyatu mu Sodoma kabiji Nka—Nkalenge mali avulako, kabiji Nkekale muntu mukatampe, kape musampwishi wawama.” Mwamona, uji nakimo kya kusalululapo.

⁶¹ Kabiji bamembala banji na nsambu ya kufukula. “Amiwa sakuya ku kikye kipwilo kokwa. Oo, muntu yense mu tauni ulanguluka mba akye kyo kyakila! Kika, ba meya bamuzhi batanwa mu kikye kipwilo.” Bino, wakonsha kutanwa ku kipwilo kyawama bingi, bino wafwainwa kupima akya kipwilo ne bantu bajimo na Binembelo. Bimye bimo bayamo mambo jo jishinda jayukanyikwa, ba—bantu bamvwala bingi bulongo

kukila kuya mu mampuzha amo. Kabiji apo ipo po tuuba akya—akya kilubo kileta lufu. Pano monai kikye.

⁶² Kabiji Abulahama, kintutu kyo akonsheshe kuuba ke kutolapo kyabubiji. Kabiji bimye byavula kyabubiji kikala kyawama kukila kitanshi, inge kyasendwa muyekawa musango. Monai, kechi papichile kimye kyabaya ne, Lota byo amwene muzhi mukatampe, kechi wamwene mukazhanji kwaluluka ke nsumba ya mukele ne, nangwa byonkabyo, aye kechi wamwene mujilo kusoka muzhi ne. Bino Abulahama watolele lubaji lwa bacheche basulwa bakwa Nkambo. Aye waikele mukiselebwa.

⁶³ Kabiji, byepi, inge Sala waambile mba . . . Bino vulukai, Sala wajinga mwanamukazhi wakijile kulamba mu yoya ntanda. Kechi kwajingapo mwanamukazhi walamba nobe byajinga Sala ne. Muntu yense, wamumwene, wa mufwalamine. Bino, kyafwainwe kwikala kya mupeelega Sala kusalulwila mu joja jishinda. Bino aye wasalulwile kwikala ne Abulahama.

⁶⁴ Oo, banabakazhi, kechi muleke diabola emumpofule meso ne, pa kwikala wayukanyikwa kabiji kutwela mu *kikye* kabiji ne *kyokya*. Ikalai ne Kilishitu! Mambo, kimye kyafwenya ke pepi, bya lumanamo bikatampe biji kulutwe, byatama kukila byajinga mu Sodoma ne Gomola, mu kino kyaalo. Sodoma ne Gomola ukekala wawamako.

⁶⁵ Bino, kimye Abulahama kyo atolele jishinda jamupeelega Lesa, kabiji kechi wajingapo na bintu muyoya ntanda, kechi wajinga na bunoshi ne. Bino nangwa byonkabyo wayukile kintu kimo, aye waingijiilenga Lesa kabiji aye waketekejile Lesa.

⁶⁶ Nanchi juba jimo kwaishile banabalume basatu, kabiji bonse bajinga nalukungu ne kukoka, kabiji Abulahama wibomvwijile lusa, aye waambile mba, “Pitai pano mwikaleko mushi ya kinchi kya maoka pa ka kimyetu kacheche.” Kabiji kimye kyo aimene popa na kwisamba nabo, aye wayukile mba kechi bajinga bantutu ne, kupichila mukwamba kwabo. Bajinga bapusanako. Kabiji Abulahama waile nakwipayana kana kang’ombe ne kwi kanengezha bulongo, kabiji Sala walengele shinkwa ne kunengezha mba baje.

⁶⁷ Pano vulukai, babiji mwi abo bajinga ba Malaika, Bamalaika mu mubiji wa muntu, kabiji umo mwiabo wajinga Lesa Ayemwine. Kabiji Umo wajinga Lesa wavundamijile nyuma Yanji ku tente.

⁶⁸ Kabiji Sala waikele mu tente. Natemwa kumona mwanamukazhi kulama kifulo kyanji byonkabya, kechi kuya na kubuula mulume waji byakuuba ne, kimye kyonse muntu umo inge waiya. Bino aye waiketetu mu tente. Kechi kyakuzhinauka ne, kape kasa abena komvwa masanyi nangwa kuuba kintu kimo.

⁶⁹ Kabiji awe Umo Wajinga Lesa, Aye watwajijiletu na kutala ku Sodoma, kabiji Aye wibabujile kyo Ailenga na kuba. Kabiji

Malaika babiji baile konka na kusapwila Mambo awama. Bino Umo washajile kunyuma, awa Ye wajinga Lesa, kabiji Aye waambile mba, “Amiwa kechi nsakufya kwi Abulahama byafyamika byo Nayuka ne, mambo aye ukekala swanyi wapano pantanda.”

⁷⁰ Oo, tuji nansambu lukeelo luno, kipwilo, kya kuyuka byafyamika bya Kwiya kwa Nkambo. Mambo, “Batokwa baleta mutende, mambo ba katelwa mba baana bakwa Lesa. Batokwa baumvwa nzala ne kilaka, mambo bakekuta. Batokwa ba michima yatoka, mambo bakamumona Lesa. Batokwa bakimote, mambo bakaswana ntanda.” Nanchi, inge kipwilo kya Lesa mumi kikaswana ntanda, kechi kujipo byafyamika ku kipwilo ne.

⁷¹ “Byonse Bataata byo Bambula, Amiwa ne mubuula,” byo byaambile Yesu. Kabiji Aye kechi bamuketekejile.

⁷² Nanchi mu moba akwa Abulahama, Aye watazhizhenga kwi abo, Waambile byobyo kimye Abulahama kyo aambilenga na Malaika, kabiji nyuma Yanji yavundamijile kutente, kabiji Aye waambijile Abulahama amba Aye ukebapepula na mwaana. Kabiji Sala, mu tente, wasekele. Kabiji Aye waambile mba, “Kika Sala kyo asekelo?” Kika kyo Amwesheshenga? “Kika Sala kyo asekelo?” Kyajingatu ma awala acheche lonaiko kasa lukyangye kufika, po kyaubiwe. Lonaiko kasa lukyangye kufika ne, kyakuba mba mujilo wafuma mwiulu ne kusoka muzhi, akya kiyukilo po kyaubiwe.

⁷³ Kabiji Yesu wibambijile mba, “Anweba muya mungi,” ba madokotala bakatampe ba bulesa, mu kyaalo kya bupopweshi amo mamilyoni bajinga baitabila. Aye waambile mba, “Anweba muya mungi, mambo kechi muyuka Binembelo nangwa Bulume bwakwa Lesa ne.” Ku kisemi kiji muyewa musango, abo bajinga bantu bafunjishiwa bulongo, bajinga bafunda masukuulu kabiji kipwilo kya peulu. Kimye mwaana kyo asemekelwe, wajinga kipe kya kipwilo. Wafwainwa kwikala Mwinaisalela. Moba eiti panyuma ya kusemwa, ke mukanda, kabiji obewa wi Mwinaisalela kya kutatwilapotu. Kabiji bung’anga bwafuminenga mu Benalevi, abo bafunjishiwe kupita myaka ma aduleendi mu Binembelo. Nangwa byonkabyo Yesu waambile mba, “Anweba muya mungi, mambo kechi muyuka Binembelo ne!” Bebiyukile monka mu buuku wabo wakufundamo, bebiyukile monka mu bukachuchumani, bebiyukile kupichila monka mu masukuulu amambo awama. Bino Yesu waambile mba, “Anweba kechi mwi Biyuka ne, Binembelo, nangwa kuyuka Bulume bwakwa Lesa ne. Inge anweba mwamuyukile Abulahama, inge ne Amiwa mwangyuka. Inge anweba mwajinga baana bakwa Abulahama, inge ne Amiwa mwangyuka, mambo Abulahama wasekejile pa kumona juba Jami, aye wamwenejile jimo juba. Byo Naimene ku meso anji kunyuma kokwa, mu mubiji wamashi, kabiji naubile kikyeye,

aye wayukile mba kyajinga Amiwa, kabiji watelele Amiwa mba 'Elohimu.' Pakuuba kuno Nauba kiyukilo kimo ku meso enu, kabiji anweba Mwatela mba 'Belezebabuba.'"

"Oo," bakonsha kwamba mba, "tuji na shetu Abulahama."

"Mwita Abulahama mba 'taata'?"

⁷⁴ Aye waambile mba, "Kika, atweba, twiba mu kipwilo. Atweba twi kyaalo kya bupopweshi. Atweba twi bantu bakila. Atweba twi bantu bakwa Lesa!"

Yesu waambile mba, "Anweba mwi diabola, aye ye shenu."

⁷⁵ Bushe Nakonsha kupashang'anya akya kisemi ku kino, leelo, kimye kyo kuji ma milyoni a bantu bamba mba Twibenakilishitu, kabiji kechi bayukapo nangwa kimo pa yeo Lesa kukila Mbwenakulipi byo ayuka pa bufuku bwa kina Ijipita ne. Kuji banabalume ne banabakazhi leelo, bavula ma milyoni bamba mba Benakilishitu ne Kilishitu mba wabo, babula kuyuka kishina kitanshi kya Bulume bwa lusanguko Bwanji, kabiji kechi ba kitopapo buwame Bwanji ne. Bakyangye kumvwapo Bulume Bwanji ne. Meso abo amvwetwa ku Bukine.

⁷⁶ Waambile mba, "Anweba mwi bampofu, batangi ba bampofu. Kechi...aye...inge bampofu batangijila bampofu, kechi bonse bakaponena mu kimbo nenyi?"

⁷⁷ Nanchi abo balanglukile mba, "Atweba twibena Kilishitu. Atweba twi baitabila. Atweba tutanwa ku bipwilo byayisha peulu. Balabi betu bafunjishiwa bingi bulongo masukuulu." Kabiji nangwa byonkabyo Yesu wibambijile mba kechi bayuka Binembelo ne.

⁷⁸ Monai Lesa byo ekifile ku meso a bamaana ne bajimuka, kabiji ne kwibisolola ku balukeke bonka bakonsha kufunda? Oo, Bulume bukatampe ne kubula kwaluka-kwanji kwa bu Lesa! Byoanji Aye kubooba bakeba kwenda mu bololoke ku meso Anji! Aye kechi ukafyapo kintu nangwa kimo kyawama ne.

⁷⁹ Kabiji ne kumona juba ajo kyaalo kyetu, ntanda yetu, yabola na bintutu bimo!

⁸⁰ Yesu wakebelenga kwibolola bulongo. Abo baambile mba, "Oo, Abulahama ye shetu. Kabiji tukekala mu Lukumo, Anweba kechi musakamane na kyokyo ne, mambo atweba twaketekela mwi Lesa. Atweba twi mapolofesa, kabiji twaketekela mwi Lesa, kabiji tufunjisha bantu betu. Pano obewa Yobe ng'anyi wakwiya na—na kakiyukilo kakala kafyamika ne kwikatela mba Lesa? Obewa kafwako kyo uji ne wi Belezebubatu." Byo kiji, bajinga na mafunjisho abo a kipwilo ne dinominesheni yabo.

Yesu wibambijile mba, "Anweba mwi badiabola." Angi langulukaipotul!

⁸¹ Kabiji Nakonsha kupashang'anya akya kisemi ku kino, leelo pa yuji na mamilyoni babena kwinunga ku bipwilo, tuji na

makumi a biumbi. Kabiji Lesa wikila na kwikala mukipwilo Kyanji jibiji, ne kuuba bintu bimo Aye byo aubilepo kokwa, ne kwilenga Ayemwine ye umotu keesha, leelo, ne myaka yonse. Kabiji bantu bafutulwilako manyuma abo, kikuputu, bamo pakuuba mba bekale bayukanyikwa, bamo bakanatu kusalulula. Kikalatu kya kukajikizha bantu! Mwafwainwa kusalulula. Anweba kuuba mwaimanatu pakachi ne. Mwafwainwa kwamba mba “ee” nangwa “ine.” Anweba kuuba mwalupuka pa kyokya kibelo muntu umo byonka byo mwajikutwela ne. Kuuba mwi kyuba ne. Muji na kyakusalululapo kimo. Salululai Kilishitu lukeelo luno.

⁸² Abo balangulukile mba kyonse kiji kulubaji lwa kipwilo ki kapuluka. Yesu waambile mba, “Twelai pa kibelo kya kepa, kabiji ne jishinda ja kepa, pakuuba bacheche bo bejimona.”

⁸³ Lekai ne mupe lujimuno lukeelo luno, kipwilo, ikalai bajimuka. Kisenda kimye buleelo, mu bololoke-bwetu atweba bene, kisemi kyabula kukajilwa-kintu nangwa kimone kya bukafutufutu kyo tubena kwikala. Ke kimye akyo banabalume ne banabakazhi po bemana mu bipwilo ne mubipona, kabiji ne kwimba ya mushingi wa Lesa, kabiji balupukamo mu kipwilo ne kupepa fwaka, kabiji ne kutoma wisiki, ne kuya ku bya kuzha, kabiji—kabiji babwela baikala bwikalo bwa ntanda, ne kwamba bya ndochi, bisela bya myendeleko, kabiji ne kwitela mba “Benakilishitu.” Mukimye banabalume ne banabakazhi bafwainwa kwenda kufuma ku pulupiti nangwa ku kipwilo, kabiji ne kufuma ku kifulo kya Bulume bwa lusanguko, amo akya kiyukilo kimo kya Bumesiya kasa-kibena kwenda mukachi kabo, kabiji inge wabula kwikala kilengwa kipya mwi Kilishitu ne, nishi pajipo kimo kyatama. Kimye mapepala amajashi abena kwikisapula; kufuma ku kitulu kimo kuya ku kitulu kikwabo, kulutwe ne kunyuma, kufuma ku mantanda a mabebe aku Kabeta kabuyeke kuya ku masaka aku Kabeta kabulenge, Lesa wikituma, bino bantu bafutulwilako manyuma abo ku kiky. Pano twakonsha kwamba mbaka, twakonsha kuuba byepi? Twafutulwila manyuma etu ku Binembelo amo Aye mo aambile mba, “Twelai pa kibelo kyakepa, kabiji ne jishinda ja kepa, pakuuba bacheche bo bejimona.”

⁸⁴ Aye waambile mba, “Byonka byokyajinga mu moba akwa Nowa, nanchi byo byo kikekala ne Pakwiya kwa Mwaana muntu.” Telekai, mu moba akwa Nowa, ntanda yayujilwemo bantu nobe byonka byakiji ne buleelo. Bya masayaasi byabo byakijile byetu. Bashimikile masifinikisi ne bapilamenda ne kuuba bintu abyo byo twakonsha kubula kuba leelo ne. [Kafwapo bijipo pa tepu ne—Waku.] Bakilapo bingi, bakatampe, bantu bajimuka. Kabiji vulukai, sayaasi yamba leelo mba, “Kwshalatu mineti umo kufika pakachi kabufuku.” Ke mineti umotu koloko kasa ikyangye kufika pa kimye kyalufu. Kijitu pepi kukila byo mulanguluka. Naketekela kuuba mba aye—

Mupashi Wazhila usa kwikikajika kikye mu muchima wa yense waitabila, “nobe byonka byo kyajinga mu moba akwa Nowa”!

⁸⁵ Baanga bapulukile mu moba akwa Nowa, kufuma mu kyokya kisemi? Eiti, eiti kufuma mu mamilyoni. Aye waambile mba, “Nanchi byobyoyo kikekala pa Kwiya kwa Mwaana muntu.”

⁸⁶ “Kabiji nobe byonka byo kyajinga mu moba a Sondoma, byobyoyo kikela pa Kwiya kwa Mwaana muntu.” Pa makumi abiumbi, kwajingatu basatu bapulukile.

⁸⁷ Mwakonsha kwaamba mba, “Musapwishi, pano nga bonse ba masauzande bo akeya Nabo?” Pano, mulongo, aba balengwa kupichila mu bisemi byavula.

⁸⁸ Amiwa kekala wakumya inge mukino kisemi mu kafuma jibumba jabaya. “Twelai pa kibelo kyakepa, ne jishinda jicheche, pakuuba bacheche bo bejitana.”

⁸⁹ Oo, Nayuka mba bipwilo, byo byamba mba, “Inge mwabika jizhina jenu mu buuku kabiji ne kwikala bamembala, *akye*, mujitu bulongo.” Kechi kujipo Kinembelo kya byobyoyo ne. Inge bintu byonse biji na jizhina buuku, kabiji mu—mu kipwilo, mukekala mabbilyoni a mabbilyoni a mabbilyoni, bintu byonse bikatwela. Nanchi misango yonse ya mipashi i kekala monka, kabiji ng’anyi musango wa byubilo bikekala Mwiulu? Kilangulukaitu ponka pano.

⁹⁰ Byonka byakonsha kwamba muntu umo kwi amiwa, “Pano pembelako mineti umo, Mulongo Branham. *Kananga-ne-kananga*, Ne bomvwine kwamba mujimi, Nayuka mba abo bakayamo.”

⁹¹ Akyo kechi kyalumbulula mba abo bakayamo nangwa pacheche ne. Paulo waambile mba, mu Kolinda Mutanshi 13, “Nangwatu ng’amba najimi ya bantu ne ya bamalaika, kabiji inge kechi nji na butemwe ne, Amiwa kafwako byonji ne.”

⁹² “Oo, Naile kumbung’eno ya kwa *Kananga-ne-kananga*. Oo, waubile bikatampe, mingilo ya bulume. Na mumwene kulabisha pampofu meso.”

⁹³ Nangwa byonkabyo wakonsha kwikala walubilamo. “Bavula bakeya kwi Amiwa mu joja juba ne kwaamba mba, ‘Nkambo, kechi Nasapwilanga mu Jizhina Jenu, kwaula nenyi? Kechi naubilenga, mu Jizhina Jenu, kechi Napangijilemo mipashi yatama nenyi? Kechi naubilenga, mu Jizhina Jenu, kechi Naubilamo mingilo yavula ikatampe nenyi?’ Aye ukamba mba, ‘Mfumai kwi Amiwa, anweba bakuba bibi, Amiwa kechi ne muyukile ne.’” “Twelai pa kibelo kyakepa, ne jishinda jakepa, pakuuba bachechetu bo bejimonu.”

⁹⁴ Lekai ne mubule bimo bimo byabalwa byakwesakanya byakonsha kwimulengela kuzakama. Mwaila sayaasi wa michi, mu muzhi wa Chicago, mwaila kubalwa kwa badokotala, amba muji sate sauzande mambo akufumya mavumo mu Chicago

buke, mu moba sate, masawakya a badokotala. Tuunga atwe tu mapilushi tucheche ne bintu bikwabo byo batoma, bya kufumya mavumo?

⁹⁵ Mwaila kubalwa, mu United States, muji baana babukende bavula kukila baana basemekwa mu masongola. Mwayuka mba Baibolo waamba mba, mu Mpitulukilo ya mizhilo 14:2, amba “mwaana wa mubukende, kyakonsha kumusendela myaka foolo aduleendi pa kuba mba kikapwe”? Baana babaana babo baana babaana babo baana babana babo baana babaana babo baana babaana babo kechi bakemana mu kipwilo kya Yehoba ne, myaka foolo aduleendi, bisemi teeni. Myaka foote mu kisemi kimo. Aba bankambo basemene bankambo- basemene bankambo-basemene bankambo-basemene nkambo-basemene bankambo-basemene bankambo-basemene bankambo bajinga ba mubukende, bafwamo mu kipikichala! Pano kika? Mbulai po kyapipwilwe.

⁹⁶ Pano tubena kwiya ku kika? Kabiji baana babula bashabo, mambo abukende, kabiji ne banabakazhi bandengamambo bamvwala mu mikwakwa nobe banabalume, akyo kiji ke kyabunya ku meso akwa Lesa, bapepa fwaka, batomena mu bikulwa bya maalwa, be-tela mba Benakilishitu. Lesa kechi waswisha joja jibumba ja bapite ne! Abo ibyo. Kabiji ke betele abo bene mba Benakilishitu? Kechi kyakukumya ne Yesu kyo aambijile mba, “Kibelo kyakepa, kabiji ne jishinda ja kepa, pakuuba bacheche bo bejimona.”

⁹⁷ Abo kechi bakonsha kwikepesha abobene ne. Bakosakana. Talai, kimye Davida kyo abujilwe na mambo abubi bo aubile, bukiji bukiji walapijile, kabiji Lesa wamutemenwe pa kyokyo. Wibabula pabubi bwabo, baamba mba, “Amiwa kechi katwela jibiji pa kyokya kizhilo ne.” Kika? Banji na bifulo byavula byakuyako, bakonsha kuya ku mayengo a baana babula bashabo ne kuswa kwitabizha byo bya. Pakuuba ke kimye kya kuuba mba basapwishi bamvwale byakondo byonse byakwa Lesa kabiji ne kusapwila Kyambo kwakubula kunekenya bintu ne, Mamboawama. Banabalume bafwainwa kwikepesha abobene.

⁹⁸ Kechi mukijipo bukishika mukachi ka Benakilishitu ne. Basaka kwamba mba, “Amiwa ne Methodist, Amiwa ne Baptist, Amiwa ne Pentekosito,” akyo kechi kyalumbulula *kyokyo* kwi Lesa ne. [Mulongo Branham waimba munwe waji—Waku.]

⁹⁹ “Amiwa naambile mujimi, Naubile byakukumya.” Tukokomensha bingi pa kyokyo, bino akyo kasa kiji kintu kimo kyampofula bavula mu bintu byo bakonsha kuuba. Kine. Aye mvula unokela pa baoloka ne babula koloka. Aye mvula utekezha kajo pamo byonka byo atekzha seku, Roy. Mvula umotu, aye Mupashi Wazhila umotu uponena pa bantu. Akyo nangwa byonkabyo kechi kyalumbulula... Kisemwa kyabo kyafwainwa kwikala kyapusanako, kufuma mu kachi ne pangye.

Kechi kumwekanyika kwapangye nangwa bya kumweshatu ne, kana Mupashi wa mukachi wakwa Lesa mumi akyo kyo kilengela awa muntu kwikala kilengwa kipya, ao wikepesha muchima wanji nangwa wa mukazhi muchima wanji ku meso akwa Lesa.

¹⁰⁰ Waamba mba, “Musapwishi, ubena kumbula mba wazhinauka bavula kufuma mu ao mamilyoni kabiji bantu foolo mbilyoni mu ntanda nyi?” Amiwa nazhinauka kana kukekala jibumba jikaya mu Kushikulwa. Langulukaipo! Amiwa mbena kwimubula Yesu byo aambile mumwe mu Mamboawama. Langulukaipo!

¹⁰¹ Kibena kuya pi? Mambo byubilo mukachi ka bantu byakila kutama, baana babula bashabo batatulwa kusemwa, akyo kibafuutamo. Monai, twakonsha kwimana pano maawala, kasa tubena kwikajika byo byo bintu, kabiji mwakonsha kumona mba tubena kwikala mu kisemi kyabantu kyabubole, kyazhatwa, kyabola-kufika-ne-peene. Kechi kyakukumya ne kyobabujila kumona biyukilo, kechi kyakukumya ne kyo babujila kumvwa Mamboawama ne, bakosa michima, bino kasa baji babupoweshi ne kukikila.

¹⁰² Bushe Yesu kechi waambile mba, “Pakuuba aye Mupashi waambishatu bulongo amba, mu bimye bya kumpelo bakekala ba kwilundumika, balupata lwakuba bibi, bakutemwa bya lusangajiko ne kutemwa Lesa ne, bakubula kupwanang’ana, bakubala kutemwa byawama, bashinta, kabiji bakwibapela bakwabo, kasa baji na kipashang’anotu kya munema wabulesa?” Mwamona? Oo, wakonsha kubijika, kine. Wakonsha kwamba na jimi, kine. Lwitabilo lukapanga bademona, kine. Bino abyoye kechi byo tubena kwambapo ne.

¹⁰³ Pano mwakonsha kwamba kwi amiwa mba, “Mulongo Branham, kiyukilo kya Bwinakilishitu kyo kika? Ng’anyi ukapuluka? Ukoba nyi, Mulongo Branham?” Amiwa mbena kuketekela kyokyo kwi Lesa. Amiwa kechi nayuka ne. Amiwa mbena kuketekela mba Amiwa ee. Mbena kwesakanya bumi bwami, pajuba pajuba, na Kyambo. Inge nabula kwikala pamo na kikye Kyambo, nishi pajipo kintu kimo kyatama, Nafwainwa kubwela kunyuma ne kuuba bulongo.

¹⁰⁴ “Kyawama,” kwamba mba, “Mulongo Branham, inge bantu baamba na jimi, bushe akyo kechi kyalumbulula mba bapuluka nenyi?” Ine, mwane! Ine, kine! Naumvwapo balozhi ne besamba na bapashi kwamba na jimi, ne byonse byabulamo maana. Namonapo bantu kwamba na jimi kabiji akwe kasa enda na muka mukwabo. Namonapo bantu kwamba na jimi, ne kutolauka-peulu-ne panshi kabiji ne kubijika nobe nzubo iji pa mujilo, kabiji waya na kuuba bya bujimbijimbi, ne kwiiba, kwamba bubela, ne bintu byonse. Kyepi kyo mwakonsha kuketekela? Ine, mwane.

105 Kulamata ku kipwilo, bakwashi mu kipwilo, bakikila byo kyafwainwa kwikala. Kika, mulanguluka mba bakonsha kupota palafini Pamulungu? Ine. Pakuuba Pakimo bauba kintu kimo kyandochi kabiji kyabola ne kuya panshi-peene. Lesa wikala mu muchima, kechi pangye ne, ke kintu kifuma mu muchima.

106 “Twelai pa kibelo kyakepa, ne jisinda ja kepa, pakuuba bacheche bo bejimoni.” Byonka byo kyajinga mu moba akwa Nowa, eititu kufuma kuboba mamilyoni; byonka byo kyajinga mu moba a Sodoma, basatutu kufuma mu mamilyoni; nanchi byo byo kikekala ne pakwiya kwa Mwaana muntu.

107 Kabiji mubena kumona bubole bo tuji nabo. Mwamona kufwanyikizha konse byo kwikala, muntu, aye uya kokwa kabiji diabola ulenga basapwishi bamo bajimuka baimana mu pulupiti kabiji walekelesha bantu.

108 Juba jikwabo muntu umo waambile mba, “Amiwa kechi nakonsha kukuswisha obewa mu pulupiti wani ne, wakonsha kulengela banabakazhi bami ku konya.” Ine, baji kala muyewa musango. Kyakonsha kwibalengela kwikala mu milanguluko yawama, babulai baleke kumvwala bibye bya kumvwala ne bintu bikwabo. Kabiji, kyawama, muntu umo wakonsha kwikyuba.

109 Naambijile mukazhami, “Bushe Amiwa nakonya, amiwa nyi? Amiwa Nakonsha nyi? Nangwa, lukatazho lwepi ne ami?” Kintu kimo mukachi kechi kyakonsha twajijila kukwachijila ne. Nafwainwa Kwikibulang’ana, Amiwa kechi natako muchima ku byakonsha kwamba muntu ne.

110 Mwaamba mba, “Usa konauna mwingilo obe.” Kyawama, mwingilo yense wakonsha konaunwa na Mamboawama, wafwainwa konaunwa.

Lesu etupe kuchichika kwa kwimana pa bya Bukine kabiji ne kubulang’ana bya Bukine pa kikyee! Ke ubi, kya buvu!

111 “Twelai pa kibelo kyakepa,” byaambile Yesu, “ne jishinda ja kepa.” Kabiji anweba mulanguluka mba mamilyoni, kabiji anweba bonse ba Methodist, Baptist, Presbyterian, Pentekosito mba mukatwela, mu kalengeshiwa buvu pa joja juba. Yesu waambile mba, “Bavula bakeya na kwikala mu Bumfumu, ne kwaamba mba, ‘Njina nsambu ya kwikala muno.’” Aye waambile mba, “Bino baana ba Bumfumu bakebapangamo. Kukekala kujila ne miteto kabiji ne kwisuma kwa meno.” Kyawama kupitulukamo mu bumi bobe lukeelo luno, Mwinakilishitu. Kukekala mamilyoni jikumi a mambilyoni betela mba Benakilishitu, kabiji bajinga bakosa mu bumi bwabo, abo bakabula kutwela pa kibelo. Yesu byo aambile.

“Baanga bakatwelamo?”

112 Amiwa kechi nayuka baanga bakatwela ne. Kitutu kimo ke kuuba mba, “Lesu, lekai ngikale umo wababo!” Byokiji. Aye ye Chibishi wa mambo. “Lekai amiwa ngikale umo.”

113 Mwaamba mba, “Mulongo Branham, wakonsha kubulang’ana byepi mba awe Mwinakilishitu?”

114 Amiwa kechi nayuka ne. Bino lekai ne mubuule byaamba Kinembelo. Kine mwaketekela Kyokyo. Kimye Mupashi Wazhila kyo atuminwe panopantanda, Lesu waambile kupichila mu Mupashi Wazhila. Aye watumine malaika kuya kulutwe—kuya kulutwe, patanshi. Kabiji Aye waambile mba, “Yanga pita mu muzhi mukachi ka bantu, kabiji ne kubika kiyukilo pa bilungi byambo, bya boba baji nakipefu kabiji bajila na mambo abya bunya, ne kolola bintu byatama.”

115 Kyabunya kyo kika? Mwanamukazhi umvwala kya kuvwala kyapasha kya mwanamulume. Kilengela Lesu kukolwa. Bushe mwafikapo kala paji kintu kyabunya nyi? Kikulengela byepi kukolwa! Kuuba wikikonsha ne. Mwanamukazhi umvwala kya kuvwala kyapasha kya mwanamulume, abyo Lesu byo e kyumvwa; wakonsha kwimba mu jibumba ja banyimbi, wakonsha kulomba pajuba pajuba, ne kubijika pajuba pajuba, nangwa kwikela Lesu pajuba pajuba, obewa wazhatwa Mukyeenyi kya Lesu. Abyo kine byo byaamba Kinembelo. “Ke kyabunya!” Kabiji ne bonse batundaika kyokyo bakekalamo na lubaji mukyokyo.

116 Lesu tupai lusa lwa kwimana kulwisha bibye. Inge mwakonsha kwimana pa buke bwenu, mwaimana popa ne kukwachijila Kyambo kya Lesu mu kuboko kwenu. Kechi kikankakalwa ne.

117 Pano twaiya kujuba, ajo, bya bunya bya bantu. Kabiji ba Malaika baya na kubika tutetesho jibiji. Kebelaipo muntu umo mu Jeffersonville, inge musaka kuyuka muntu ukafikizha, kebelaipo muntu umo mu muzhi wetu ao umvwa kipefu ne kujila, kimye kyonse watako muchima ne kusakamana, kabiji ne kulombelela bya bunya byubiwa mu muzhi. Mwakonsha kusutula kuboko kwenu ne kusota pa muntu umo nyi? Pano tolai kikye Kinembelo, “Twelai pa kibelo kyakepa, ne pajishinda ja kepa, ajo jitwala ku Bumi, bacheche bo bejitana.” Abo bobonka bafwainwa kubikwa katetesho.

118 Oo, Nakonsha kwimumweshu bavula baya ku kipwilo. Nakonsha kwimumweshu bavula bamba mu jibumba ja banyibi. Nakonsha kwimumweshu bavula bafunjisha sukuulu wa Pamulungu. Nakonsha kwimumweshu bavula batangi ba—ba bipamo bikatampe. Nakonsha kwimumweshu bavula babijika, bavula baamba najimi, bavula bengila mu mwingilo wa Mamboawama.

119 Pano mweshai umo ao mu muchima wangi wakatazhiwa na bubu bwa ino ntanda! Mweshai musapwishi wakonsha kwimana

leelo ne kuzhachisha aa madinominesheni. Mweshai musapwishi umo wakonsha kwimana ne kwaamba mba bintu, kabiji ne kwi azhachisha madinominesheni. Aye kyawama wabula kwikyuba, aye ukapangwa, aja jo jichikichi ja kajo kanji.

¹²⁰ Kechi kyakukumya ne Billy Graham wabujile Jack Moore, amba, kechi mumone mbung'eno inga ikalako ne, waambile mba, "Aye kechi Baptist, nangwa kechi ye Methodist nangwa Pentekosito ne." Waambile mba, "Kabiji bonse bamushikwa." Kine, Amiwa kechi mbena mba... Ene mambo o Naambila mba, Amiwa kuuba ne kyamba muvula ya bantu ne. Amiwa ng'amba ku kipwilo kyami. Amiwa njina kondo, mambo kimye kya kwesekwa kiji pe amiwa.

¹²¹ Baamba mba, "Inge wakonsha kwiya, kikekalatu bulongo, pakuuba kwambapo kyatama pa Kyokyo ne." Kyawama kijitu pamo nobe kupulusha kupema kobe.

¹²² Amiwa kasapwilanga byaamba Lesa mba sapwila! Abyo ibyo. Umo wa mwiabo baji eiti ukekala kuntu kumo. Umo wa mwiabo ukekala kuntu kumo. Bino pa joja juba Amiwa kechi nkeba kwikala wazhatwa namambo akwamba mba Najinga wanekenya bintu mambotu amafujisho a bantu nangwa mafunjisho amo a kipwilo, nangwa dinominesheni imo. Amiwa nasapwila Bukine!

¹²³ Baamba ma, "Kika kyo ubujila, kika nyingijilo yobe, Mulongo Branham, imweka nobe yabaya bingi, kika kyo yabujila kukumbana nobe baabo bakwabo banabalume byo babena kuuba?"

¹²⁴ Abyo ibyo ponkapo. Byokiji. Amiwa ngya mu muzhi, mwaketekela mba ba Assemblies of God bakonsha kwingijila pamo ne amiwa nyi? Kechi ku byobya byo Naketekela ne, kuuba be kyuba ne. Kwakonsha kumweka umu mu kimye kicheche. Mwalanguluka mba ba Methodist bakonsha nyi? Esekai, mutaane bishika. Mwaikalako wankutangijila pa mulungu umu. Inge mwatwela mukachi, mukaya mukachi mu Jizhina ja Yesu. Abyo ibyo.

¹²⁵ Oo, ee byonkabyo, bakutwala kokwa, kine, bakutwala kokwa kuntu kumo pa kifulo, nanchi pakuuba mba obewa ubule kunungakana nabo mu jishinda jiji jonse ne. Kabiji obewa umvwe wafumako, ke baambe mba, "Oo, pano, Mulongo Branham umweka nobe bongo bwashajilako pacheche, mwayuka. Aye. . ."

¹²⁶ Inge Amiwa nashajilako mu bongo, nanchi Baibolo ye washajilamo mu Kufunjisha. Abyo byo byaamba Baibolo! Ee, mwane. Talai!

¹²⁷ Yesu waambile mba, "Kika kyo mutelela Amiwa mba 'Belezebabuba'? Anweba mwaketekejile Solomoni, na kiyukilo kyanji kya kuyuka bapashi. Mwaketekejile juba janji. Aye Mfumu mwanamukazhi wa ku Kabeta kabulenge waishile

kufuma kwapela ntanda, na kumona akya kya bupe, kabiji aye wikiketekejile byo e kimwene. Kabiji anweba mwikala kasa mubena kwikimona pajuba pajuba, ne kwikiketekelatu ne.”

¹²⁸ Kabiji ne balongo Banji Ayemwine kechi ba Muketekejile ne. Waambile mba, “Yanga ku kijilo,” Aye waambile mba, “bino kechi Mbena kuya ponkapano ne.” Aye waile mujishinda jikwabo, mambo balongo Banji Ayemwine kechi ba Muketekejile ne. Abyo ibyo. “Twelai pa kibelo kyakepa, ne jishinda jakepa, bino bacheche bo bejimana.”

¹²⁹ Byo kyaishile ku baana babwanga, kufika pa kimye kubekya, bajinga pepi? Mwanamukazhi ne mwanamulume baimene Nanji kwipi ku musalabo, Yoano ne Maliya. Bashala bayile.

¹³⁰ Akye ke kimye kya kubekya. Kino kyo kimye. Kino kyo kimye Lesa po-abena kuba bintu. Kino kyo kimye Mesiyasa kyoanji pantanda. Kino kyo kimye Bulume bwa Lesa po bubena kwenda mu bantu Banji. Kabiji bebatela mba “bakyongo-kyazhila, bakonya, bakonya,” oo, baji nobe byobya. Pakuuba kimye kyafika!

¹³¹ Akwa kine kukekala kulengeshiwa buvu bwabaya pa juba ja kinje.

¹³² Oo, upotesha maalwa, wayuka koakekala pa juba ja kinje. Kabiji kyakolwa wayuka ko akatanwa. Kabiji ne pite wayuka ko akemana. Kabiji ne uteya ngyuka wayuka ko akemana. Kabiji ne upendwa wayuka ko akemana. Aye kechi ukalengeshiwa buvu ne.

¹³³ Pakuuba kulengeshiwa buvu po kukekala, ke pa boba balangulukilenga mba bajitu bulongo. Apo po pakekala buvu. “Byo bakemana kokwa, bakamba mba, ‘Kine, twapangile bademona mu Jizhina Jenu. Twi basapwishi. Atweba twi bakubipwilo kananga-kananga. Twaubilenga byakukumya bikatampe. Oo, twasapwijile! Kika, Amiwa najinga—Amiwa najinga kalama mu kipwilo. Najinga bishopu. Najinga *kikye*.’ Mfumai kwi Amiwa, anweba banguba bibi, Amiwa kechi ne muyukilepo ne.” Byobyoby kiji. Ako kokulengeshiwa buvu. Aye waambile mba, “Baana ba baana babo bakeya ne kwikala mu Bumfumu, ne kwaamba mba, ‘Tuji nasambu ya kwikala muno,’ kabiji bakataiwa mu kalunga kafishi, amo mukekala kujila ne miteto kabiji ne kwisuma ku meno.” “Twelai pa kibelo kyakepa, ne jishinda jakepa, byo bitwala ku Bumi, bo bacheche bakejitana.”

¹³⁴ Kwi anweba, bantu batemwe bami, lekeelo luno, telekai ku kino. Amiwa kechi nalengelepo bibye ne. Amiwa mwingilo wami ke wa Kwiibibulang’ana. Ao yeyeka mwingilo Wami. Inge Nabula kusapwilapo mbila ikwabo mu bumi bwami, akyo bo Bukine: kukekalatu bantu bacheche bakapuluka. Vulukaitu kyoko: ke bachechetu. Obewa ukekale umo wabo.

135 “Bo bang’anyi, Mulongo Branham?” Amiwa kechi nayuka ne. Kafwako mukwabo wayuka ne. Atweba bene twiingijila lupulukilo lwetu na moyo ne nakuzakama.

136 Bino wafwainwa kwikala mundonda yakwa Lesa. Inge muchima obe kechi upemena pamo na Baibolo ne, nishi pajipo kintu kimo kyatamako, pajipo kintu kimo kyatama. Nangwatu kipwilo kyobe kyambe byepi, kechi wakonsha kutwelamo kupichila mu byo byo ne. Obewa wafwainwa kutwelamo kupichila mu byaamba Lesa. Awe ye Buuku mukafuma luzhachisho lobe, Baibolo. Ikala Nanji!

137 “Oo,” mwaamba mba, “kyawama, Amiwa nabatizhiwa mu Jizhina ja Nkambo Yesu.” Akyo kyokiji bulongo, ao ke Baibolo. Pakuuba umvwe abwa bumi kechi bulondela ne, kechi kyaaletelepo buwame kwi obewa pa kubatizhiwa ne.

138 Mwaamba mba, “Kyawama, Amiwa natambula Mupashi Wazhila.” Akyo kyawama, abyo byo wafwaijilwe kuuba. Bino umvwe bumi kechi mo buji ne!

139 Vulukai mba, seku itambula bulume bumo bonka buponenapo pa wichi pakuuba mba kikome, bulengela seku kubijika, ne aneba pamo. Aka kaluseku ka kacheche ke mana kasa kaji na lusekelo nobe pamotu nawichi. Abyo ibyo, wikela ku bumi bumo. Kabiji mubi wakonsha kwikala mu Kyeenyi kya Lesa, ne kubijika lushijilo, kabiji ne kwikala nobe Mwinakilishitu. Pakuuba umvwe kafwamo kyapusanako mu muchima ne! Aye wakonsha kwikala na Bulume bumotu bwakupanga mipashi yatama. Yesu byo aambile. Aye wakonsha kusapwila Mambo awama bulongotu byonka byakonsha kuuba musapwishi mukwabo. Abyo kine ibyo, Yesu byo aambile. Aye Baibolo byo ekifunjisha. Ee, mwane. “Nangwa Naamba na jimi ya bantu ne ya bamalaika, nangwa Napana mubiji wami amba bamusoke nobe kitapisho, Napana bipe byami byonse na kujisha bayaji, Na—Naikala na lwitabilo lwa kwendesha mitumba, Nauba ne byonse bye bintu, Nasapwila mu Jizhina Janji, Napanga bademona mu Jizhina Janji,” aye waambile mba, “Amiwa kafwako byonji ne.” Nanchi, aye wakonsha kwikyuba, kabiji “kafwako byoaji ne.” Ikalai nabobo buyuke?

140 Pano, kintutu kyakuuba ke, kufuma mu muchima obe, kwikala Mwinakilishitu, pano twela pa kibelo kyakepa. Mambo, jishinda jabaya jitwala kulonaiko, kabiji mamilyoni na mamilyoni aba baitabila mukino kisemi bakaya mu kyokya kifulo. Mambo, kutwela pa kibelo kyakepa, kabiji ne jishinda jakepa, ke jobetu ne Kilishitu.

141 “Jishinda jakepa jo jitwala ku Bumi, kabiji bo bachechetu bakejimonu.” Pano, abyo byo Byambo bya Nkambo yetu. Ami! Kika Aye kyo aubilenga? Waimene popa, kasa abena kuyuka milanguluko yabo.

142 Kabiji aye waambile mba, “Ye Belezebabuba. Kyawama, wakonsha byepi Aye kwikala Lesa? Aye ye Muntu! Afumine kwepi ao maana?” baambile mba Monka mu muzhi Wanji.

143 Inge mwaamba mu muzhi papo, kibena kumweka nobe . . . Amiwa kechi naamba kikye mu kulengulula anweba bantu ne; anweba mwi Benakilishitu, mwatemwa amiwa. Mwaenda kuya mu muzhi muno, kabiji kimwekatu nobe bulume bwakwa Satana bwakuponesha panshi. Ino mpuzha yazhatwa. Uno muzhi wazhatwa.

144 Kika kyoaambile Billy Graham kimye kyo atwelele mu Louisville? Aye waambile mba yo “mpuzha yakila kutangijilwana bademona” yo akimonapo mu bumi bwanji. Wiikibikile mupepala wa byambo, ne kwaamba mba, “Mwakonsha kumvwa bulume bwa kumanyikwa na bademona.”

145 Ee, Nakonsha kwikyumvwa. Kika? Uno ye muzhi wami amiwa mwine. Kimye Yesu kyo abwelele kumuzhi Kwanji Mwine, Aye waambile mba mingilo yavula yabulume Aye kechi wiiyubile ne, mambo akubula lwitabilo. Waambile mba, “Ngauzhi kechi wikala na munema, musapwishi, kana mu kyanji mwine—mu kyaalo kyanji mwine, mu bantu banji mwine ne.” Mwamona? Anweba kechi mwakonsha kwi kikwasha ne, Kinembelo byo kyaamba. Mwamona?

146 Pano, inge mwaiya mu muzhi muno! Kabiji mwabula kumbuula Amiwa kechi nakonsha kuyuka ne. Nkenda kuya ku bantu ne kwimuna kuboko kwami ne kwaamba mba, “O, Mulongo Branham, Nakutemwa.” Kabiji mukayukatu mba abo kebubela! Mwayukatu mba abo kebubela. Inge Lesa wakonsha kumbuula ami biji mu muchima, kika Aye kyoakonsha kubula kumbujila kyokyo?

147 Kine, kabiji monka mukachi ka bantu benu kuzhokoloka muzhi! Inge bakumona, baamba mba, “Kyawama, mwayuka, Namwene kuntu kumo-kumo . . .”

“Kwepi? Kyajinga kwepi?”

“Akwa . . .”

“Uu! Twamuyuka awa muntu!”

148 Mwikyumvwa. Lekai ne mubuule, muleka muntu umo kwiya kunzubo yenu ao wabula kwimutemwa bulongo ne, ikalaitu mu nzubo yenu pachechetu kabiji mukomvwa aya ng’umvwino ingi. Mvuzhai kyokyo bimye fotiini sauzande, pano musakutana kyo Mbena kwambapo. Pano mwatwela mu kifulo kyakuuba mba muntu yense wimutemwa, aya ng’umvwino ya kutambulwilwa, bino, oo, ami, kabiji kechi mwakonsha kwikala popa kikupu ne, mwamona. Byokiji, monai, ke mupashi. Kabiji bantu kechi bayuka byo kiji ne, bakumya kika bantu kyo baikela babipishiwa bingi.

149 Kika kilengela banabakazhi bawama, kika kilengela banabakazhi bawama kumvwala vwajilo yatama kabiji balupuka kebaye? Kika kilengela, nangwatu luno kimye kyokuji mashika, bacheche basongwakazhi ba myaka-sikisitiini-yakukoma, na byakumvwala byoakonsha kubula kumvwala kumeso aba inanzi, kabiji keaye ne pa mukwakwa? Ke mambo, kechi ayewa mwaana (awa mwanyike kechi wayukapo ne kyawama ne), bino mambo akuuba mba musapwishi mu pulupiti wakakalwa kukwachijila kifulo kyanji kya mwingilo. Abo kine ibyo. Kine. Banabakazhi batanwa pa mukwakwa, kabiji kasa baji navwajilo-yabulalelale ne bintutu bya yewa musango, kabiji bandengamambo kebebatale kabiji kechi wayuka mba aye wazhatwatu pamo nobe walengananji mambo awe mwanamulume ne. Yesu byo aambile! Yesu waambile mba, “Yense utala pa mwanamukazhi na lukumbwa, walengakala nanji mambo abukende monka mu muchima wani, kabiji ukatotelwepo pa kyokya pa juba ja kije.” Twelai pa kibelo kyakepa, kabiji ne jishinda jakepa!

150 Nayuka mulanguluka mba Amiwa ne muntu wibikosesha. Amiwa kechi ne bikosesha ne! Amiwa ne mulongo wenu, kabiji Amiwa ne mutemwa.

151 Nyemai bukaji bubena kwiya! Yanga ku musalabo na kujila poso muchima obe wayuzhiwa na Mupashi Wazhila, akyo kikafutulwila nyuma yobe ku byonse bya muntanda, kabiji ne kwenda wa bulesa kumeso Anji, na muchima obe kasa abena kupya namambo a Aye. Butemwe! Kechi mwingilo ne. Kilishitu kechi mwingilo ne, kwingijila Kilishitu, ke butemwe bwingijila Kilishitu. Kikukoka, kikukanya, poso pemeno yonse ya bumi bobo ke yendele pamo Nanji. Apo popo wakonsha kumona ubi.

152 Kabiji Aye wajijile panopantanda. Kyamufichile pa muchima Lesa mu moba akwa Nowa, byo Amwene michima yabo. Kabiji Yesu waikela pa muntumba, ne kwaamba mba, “Yelusalema, Yelusalema, bimye binga Amiwa byo nkemufukamina, bino kimye kyenu kyaiya kabiji nzubo yenu ke masalatu.”

153 Nanchi byobyoyo kikekala pa Kwiya kwa Mwaana wa Lesa, michima ya baitabila kyakine kine yalajika. Aye ubena kumona ponkapano amba kwafwainwa kwikala kusangululwa kukumbana ino ntanda. Kyakonsha kwikala byepi jibumba ja baana babula bashabo? Kyakonsha kwikala byepi, kasa baji bazhatwa kala?

154 Abo Bumfumu bwa Lesa buji pamo nobe muntu wateele makonde anji pa kalunga, kabiji, byo abututwile, mwajinga bakovu, miloolo, babombwe, bakanka, ne masabi amo. Kechi kyajinga aye kufukula ne, aye wateeletu ponka pa kitulu. Abo byo byuba Mambo awama. Abo byo oba Billy Graham, Oral Roberts, ne amiwa, kabiji ne bonse basapwishi bakwabo babena

kusapwila Mambo awama, bebuteeyatu, wibukoka, “Abyo byobaji, Nkambo.” Pano kika kyo tubena kuuba kimye kyonse? Twatana mba, kasa ukyangye kubwela jibiji, abo babwela jibiji monka mu kizhiba. Kyokika? Kyakutatwilapotu, wajinga kovu. Akya kechi kya mwalulwile ne, pa kukwatwa mu bukonde bwa Mambo awama. Aye wajinga kovu kyakutatwilapotu. Aye wajinga kanka kyakutatwilapotu. Aye wajinga muloolo kyakutatwilapotu. Aye wajinga kafutufutu kasa akyangye kwiya ne mu kipwilo ne. Aye kechi wajingapo ne nakilaka kya kuleka maalwa ne kuta ngyuka, ne kupepa ne kubepa bubela, kabiji ne kwibiba. Aye waishiletu mambo wajinga na moyo wakuchina ngehena. Obewa ubena kwilenga obewa mwine kwikala membala wayo, inge wauba kyokyo. Akyo kine. “Twelai pa kibelo kyakepa, ne jishinda ja kepa, kabiji bo bacheche ba kejitana.”

Twelai tulombe.

¹⁵⁵ Nkambo, oo, palanguzhai, Nkambo. Esekai mambo ami ponka pano, Nkambo. Kechi mundeke nkeye ku kije ku meso Enu ne, panyuma yakusapwila bibye. Oo, inge mujipo kintu kimo kiyatama mwi amiwa, Nkambo, kifumyai, nasashijila! Twamona juba jo tubena kwikalamo, apo banabalume ne banabakazhi babena kwikala bakosakana. Baji na buvu. Anweba mwaambile kimye kimo mba, “Kechi mujipo nangwa buya mu banabakazhi ba mu Ziona ne.” Buwame bwabo bwafumishiwapo kya kuuba mba kechi bakonsha kwiwamisha ne. Anweba Nkambo, kilangulukai! Kabiji yukai mba katajilo ka kimye ka bena kuya, kwashalatu mineti umu nangwa babiji, kabiji lonaiko lubena kwiya, mulekai aye wabipisha ekale wabipisha byonkabyo.

¹⁵⁶ Lesa, tubushai atweba bonse lukeelo luno. Tusukanyai, Nkambo! Twamona biyukilo kumweka. Tuji na meso etu ashikuka pakuuba mba tuyuke kyokyo. Twamona mamilyoni, mamilyoni, Nkambo, abo bafutulwilako manyuma abo ne kuya baya. Nakumya, kika kyo Nakonsha kuuba, kika kyo Nakonsha kuuba, Anweba Nkambo? Kujipo kintu kimo, Nkambo? Inge kisenda kusapwila kwabaya, milombelo yavula, bintu bikwabo byavula, nkwashai, Nkambo, pakuuba mba Ndete Mbila kubantu. Kika kyo Nakonsha kuba? Bino batwajijilatu na Kwiikana. Anweba Mubena kuba biyukilo ne kuba byakukumya Byenu, kabiji nangwa byonkabyo bantu batwajijilatu kuya kulutwe. Bushe kyo Kinembelo Kyenu kyafwainwa kufikizhiwa, bushe kyo kimye kya kwamba mba “Kafwako muntu wakonsha kwiya Nkonji kana Ba Taata bamukoka, kabiji bonse bo Bapa kwi Bataata bakeya Nkonji”? Nkambo Lesa, swishai lukeelo luno amba bantu babuke ne kumona kiyukilo kyapelako pantanda. Nalomba, Lesa, amba Anweba musakuswishapo kintu kimo ku bantu.

¹⁵⁷ Peshai babo bantu bacheche baji muno lukeelo luno. Lesa, tatwilai na Mulongo Neville, Nkambo. Bukai mubiji wanji.

Wakolwa lukeelo luno, Nkambo, wakatazhiwa munda. Nalomba mba kuboko Kweni kwa lubuko kwikale pa aye. Bushai mweo wanji.

¹⁵⁸ Lesa, yai mukachi ka kino kipwilo. Muji banabalume ne banabakazhi baikala muno abo Bokabula kumona jibiji ne poso pajoja juba ja kije, apo Amiwa po ketotolwela. Bino Natanga Kyambo Kyenu mba, “Twelai pa kibelo kyakepa, kabiji jishinda jakepa, pakuuba bacheche bo bejimonu.” Anweba Nkambo, lekai babo bekale boba “bacheche,” bamo bamwiabo, mwakonsha Anweba nyi, Nkambo? Swishai muntu yense uji muno.

¹⁵⁹ Nalomba nobe byonka muntu byoakonsha kulomba. Nkambo, abo bantu bakonsha nkungubila kiji kyonse, mwaila nkukwasha. Inge Najinga nanzala, bakonsha kujisha amiwa. Inge Nakonsha kukeba suti, bakonsha kupotela. Bakonsha kuya pamo ne kupotela amiwa motoka, amba sapwilo Mambo awama. Bakonsha kuba kiji kyonse mujojo jishinda. Anweba Taata, palanguzhai myeo yabo lukeelo luno, nasashijila kyuubai, kabiji balekai bapalanguzhe kumeso Enu. Amiwa kechi nayuka ne, Naketekela namba yense uji muno mukachi kabo uji muboba Basalwa. Kabiji mbikaipo, ne amiwa, Nkambo. Kabiji inge pajipo kintu kimo mwi amiwa kyakundengela mba mbule kutanwako, Nkambo, Anweba kisololai kwi amiwa, Amiwa nsakwikiwamisha pankapano. Nakeba kwikala wabula luzhinawo, Nkambo, amba alwa lukeelo kechi kukekale lukatazho pa mukola ne. Nakeba kutwela pa joja juba. Kabiji kechi Nayuka kana kikekala kimye ka, kyakonsha kwikala nangwa jaleelo. Nanchi, kwashai kuyuka, kwashai babo bantu kuyuka.

¹⁶⁰ Kabiji inge twamona michima yetu kubula kwikala yasakamana ne! Oo, tumvwa buwame pa Mbila yawama kwiiteleka pa waileshi, nangwa kuya ku kipwilo. Tusata pa Mbila yawama. Atweba kechi tutako muchima kwamba pe Yesu kuji konse ne. Bino, Nkambo, bushe bubi buji bingi na kinemenezhi kwi atweba, kabiji buleta mipolo mu meso etu, kupemashika ne kujila kabiji ne kwibwimena kyakine, bintu byonse, byabunya byubiwa mu muzhi? Nkambo, lekai awa Malaika wa Lesa amone pakachi ketu, ne kwitubika tuyukilo. Kiswishai kye, Nkambo.

¹⁶¹ Nangwa byonkabyo iyai, Nkambo Yesu, ponka pano ne kunengezha michima yetu, kabiji mwitupe biyukilo Byenu byakine tuyuke mba Anweba muji mukachi ketu, pakuuba tuyuke amba tubena kutambula—kutambula kiyukilo kyapelako mpelo ya kino kisasi kasa ikyangye kufika.

¹⁶² Kabiji twamona bukubula shabo, kimye muntu po abena kwikala mu kyaalo kasa aji na baana mu bakazhi babakwabo, kabiji—kabiji basongwakazhi babacheche pa mukwakwa, kabiji

maaduleendi bo bapanga masukuulu pa mwaka pa mwaka ne bamyaka-icheche kwikala ke basemi, kabiji kechi kujipo mushingi ne, kabiji banabakazhi babena kwaluka ke bulembe, abo bene, kupichila mu kupepa ne—ne kutoma, ne matelevizhoni kabiji ne bikwobotu bibena konauna milanguluko ya baana babacheche. Anweba Nkambo, bikemana bimye binga? Kabiji Anweba, Lesa Wazhila!

¹⁶³ Anweba Taata, Njina—Njina ng’umvwino yenyi leelo ya kuuba mba kintu kimo kyubiwe bukiji bukiji, Nkambo. Amiwa kechi nayuka byakwamba ne, bino Nalomba, Nkambo, namba Anweba musakubika mu michima yetu byo twafwainwa kuba. Swishai bibye bintu, Nkambo. Twibipuzha mwi Yesu mu Jizhina. Amena.

¹⁶⁴ Kimye kyafwenya ke pepi. Muntu yense wamaana uji na milanguluko, wayuka mba kintu kimo kyakonsha kumweka. Kechi mujipo muntu umo muno mu kishimikwa, uji na maana alumbuluka, bino wayuka mba ino ntanda kechi yakonsha kutwajijila na bibye byubilo ne.

Kechi twakonsha kwimana ne, balunda. Kechi kujipo kintu kimo ne, nobe kafunga wenu kabiji mulongo wenu, kechi kujipo kintu kimo kyo Nakonsha kwi mutwalako lukeelo luno ne kanatu Yesu Kilishitu. Kechi kujipo kintu kimo kyo Nayuka ne. Kana kulangulukatu pa bintu bya awiilwe mba bikeya Kushikulwa kasa kukyanye kubiwa, bintu byonse byo Nayuka bya fikizhiwa kala.

¹⁶⁵ Mubena kwamba mba, “Pano nga kiyukilo kya lukinya?” Akyo kikeya mu kimye kya Malwa akatampe. Akyo Kipwilo nishi kyaya pa kyokya kimye. Abo kechi bakebabika kiyukilo ne, abo nishi baya kala, mwamona. Kubikwa kwa tuyukilo kubena kubiwa ponka pano. Kubikwa tuyukilo ke kumweshwa, musango ye ujimo. Nyemenai kwi Lesa, nyemenai kwi Aye bukiji bukiji!

¹⁶⁶ Nakumya lukeelo luno, kimye kyo tubena kupembelela pa kakimye kacheche. Kabiji Naumvwa nobe mwauba. Amiwa—Amiwa mbena kumvwa ng’umvwino yenu, umo pe anweba ubena kweseka kulanguluka mba, “Anweba Lesa, palanguzhai amiwa!” Abyo byo Mbena kumvwa, ne amiwa. Navuluka mba ao Mambila a musango yuwe, mulunda, kechi aitabilwa mu bantu ne. Anweba mwi azhachisha ne kwi-. . . anweba—anweba mwi abwezha panshi. Muntu umo wakonsha kuuba kyokyo. Naketekela mba kyajinga kape muntu mukwabo. Bino umvwe kyafikizhiwa mu kimye kyami kya kwikyuba, inge Nafwainwa kwikala wakomvwa banabakazhi, lekai ngomvwe. Inge Amiwa. . . Davida waambile mba, “Kyangwamina amiwa kwikala kya kunyatapo mauku ku Nzubo ya Lesa, kukila kwikala mu matente na bubu.” Abyo ibyo. Kyonse Lesa kyo akukebela mba ube, kyuube. Kumvwa buvu ne. Inge kujipo. . .

167 Kabiji, vulukai, Nayuka mba akye ke kintu kyabaya bingi. Mwaamba mba, “Mulongo Branham, waamba mba myeo eititu yo yakonsha kupulukatu?”

168 Amiwa kechi nayuka baanga bakapuluka ne, Amiwa kuuba ne mubula ne. Bino Naamba kintu kimo: bakekala bachepe bingi, mujuba jiji nobe bibye. Ingi langulukaitu, mu joja juba jo Ajingamo, baanga bapulukile. Langulukai pa juba jakwa Nowa, ne juba ja kwa Lota—Lota, kabiji ne bonsetu, Aye waambile mba, “Byo kikekala ne pakwiya kwa Mwaana muntu, mambo akuuba mba, twelai pa kibelo kyakepa, ne jishinda jakepa.” Mwamona, mutwelamo bunke bwenu anweba bene, ne Aye, kabiji byo byonka. Mwamona? “Kabiji bo bacheche bakejimona.” Baanga baketekela mba abo bo Bukine bwa Mambo awama? Yesu Kilishitu waambile mba, “Bo bacheche bakejimona.” Bo bachechetu. Ikala umo wabobo bacheche. Nayuka mba akyo ke kintu kya kosa, ke kintu kingijiwa nabulume. Kabiji nkipwisha bulume pa kwikyamba, mambo akwimumvwina butemwe bwa bumuntu, pakuuba butemwe bwa Lesa buukambizha mba ne mubuule.

169 Pano, Mupashi Wazhila umotu awa waingijile mu moba akwa Abulahama, waingijile mu moba akwa Kilishitu, walaile kwiya kuno na kuuba kintu kimo. Aye uji pano. Pano, inge Nebuula kya Bukine, Lesa wakishika kubobo Bukine.

170 Inge Nabula kulama byambo byami, Amiwa kechi ne muntu ulama byambo byami ne. Inge wabula kulama byambo byobe, kechi wi muntu ulama byambo byo ne. Bino, Nakonsha kulaya kintu kimo kabiji Nabula kwikifikizha, bino—bino Nkeya na kwimubuula. Inge Amiwa njina na kongole yenu, kabiji nafyama kwi anweba, Amiwa nishi ne kafutufutu. Inge Naiya na kwimubuula mba, “Njina kongole yenu, bino kechi Nemulipila ne, bino Amiwa kengila nangovu Monakonsha kuubila,” pano mundekeleko mambo kabiji nkwashaiko. Mwamona?

171 Atweba bonse tuji nakongole kwi Lesa mu kintu kimo. Atweba tuji nakongole ya bumi bwetu kwi Aye. Twayai twikale ba kishika pa kikye. Mwaenda na kwaamba mba... Kechi mwakonsha kwaamba mba, “Kyawama, pano talai, Ami—Ami ne Presbyterian. Ami ne Methodist. Ami ne Pentekosito. Ami ne Church of God. Ami ne Nazarene. Ami ne Pilgrim Holiness.” Kechi mwakonsha kulanguluka kyokyo ne! Mukekala mamilyoni ba byoby mu ngehena. Anweba ikalaitu Mwinakilishitu, mwi Kilishitu.

172 Baanga bakonsha kwamba mba, “Mulongo Branham, uvulukepo mu milombelo, Nakeba kwimana”? Lesa emupeshe.

173 Nkambo, Anweba mwamona maboko abo. Kimye kyo kino, aye Mupashi Wazhila mukatampe wazhokoloka muno mukishimikwa lukeelo luno. Naumvwa Kyeenyi Kyenu. Nalanguluka mba Anweba muji muno na kufikizha Kyambo

Kyenu, “Amiwa Yehoba na byala, kabiji Amiwa katekezha bufuku ne mute, kuchiina mba muntu umo wakonsha kwi kinsopola kufuma mu kuboko Kwami.” Anweba mwatumine Kyambo Kyenu na kwingila mwingilo, kabiji Ki—Kikooba yeo mwingilo, Nkambo. Akyo Kinembelo kyaamba mba Anweba mwi umotu keesha, leelo, ne myaka yonse.

¹⁷⁴ Abo kechi baketekejile ne, aba bantu mu moba Enu kechi baketekejile mba Mupashi Wazhila wajinga mwi Anweba ne. Kabiji Anweba mwilengele Anweba bene (kwikala Muntu) Lesa, akyo, Anweba mwajinga Mwaana wa Lesa wasemekwa-mukisungu ao waishile panontanda na kwitukuula atweba ku bundengamambo bwetu. Kabiji mambo bamwene Mupashi wa Lesa mwi Anweba, baesekele kwi kyalulula ke kintu kingi. Kabiji Anweba mwibabujile mba, Nkambo, “Kechi Amiwa yami nyingila mingilo ne, kana Ba Taata baikala mwi Amiwa. Aye ye wingila mingilo. Inge anweba mwaichile Abulahama kwikala ke ‘shenu.’ Abulahama wamwene juba Jami.” Kine, wikyubile, kimye kyo aimene kwi Aye, Wamumwene kuba yoya mingilo ne kiyukilo. “Aye wamwene juba Jami ne kusekela wasekejile.” Waambile mba, “Anweba muya mungi, mambo akubula kuyuka Kinembelo nangwa Bulume bwa Lesa ne, kyakuuba mba Lesa ukamunyeng’amina kisungu, kabiji ukasema Mwaana wamulume (kupichila mulusemo lwa kisungu) kabiji ne kwikala Aye mwine mukuyula konse kwa Bulume Bwanji, mu yewa Muntu umo.”

¹⁷⁵ Kabiji Aye ukasenda Mashi amo kufuma mu yewa Mubiji ao Ye etupele kwikala Kitapisho, kabiji ne kuzhijika bantu abo Ayemwine mo akonsha kwikala, ne kutwajijila kwingijilamo mwingilo Wanji kufikatu ne ku mpelo ya byonse! Anweba Lesa, bushai bantu mba bamone kyokyo. Kiswishai kye. Pulushai muntu yense wajikusutula kuboko kwanji. Omvwai michima yabo. Nkambo, maboko ami asutulwa peulu. Ntokeshai, Anweba Nkambo. Ino ke nzubo yakolwelwamo. Ino yo mpuzha mo twafwainwa komvwewa. Lekai Mupashi Wazhila etomvwe lukeelo luno, kabiji ne kwitutokesha kufuma kububole.

¹⁷⁶ Twalomba, Nkambo, amba kechi mwikalapo muntu nangwa umo wakufuma muno ne kana bekale bayuzhiwamo na Mupashi Wenu. Kape kechi kusakwikalapo ngumvwino imo ya ku mubiji ne byo kisakubiwa. Bino, Nkambo, twelai mukachi, fumyaimo kibabulwa kabiji ne kwitumweshu byotuji, Nkambo. Kiswishai kye. Kabiji tuyuzhai na Mupashi Wenu, na muchima wa bukine kabiji watoka. Kabiji mu kino kimye kya kumanyikwa ne bya meseko akosa, Anweba musakuyanga nakwikala wawamisha kabiji ne butemwe bwabaya mwi atweba mukimye kyo tubena kwenda kuya kulutwe, na kupembelela aja juba. Kimye mipolo yetu po ibena kupita pa mabuta etu, na mambo abubi bwa muzhi, lekai Mupashi Wazhila atale panshi ne kwaamba mba, “Kujipo umo ye Nakonsha kubikapo kiyukilo, wamulume Wami,

wamukazhi Wami.” Kiswishai kye, Nkambo. Lekai kitanwe mwi atweba leelo. Twikipuzha mu Jizhina ja Yesu. Amena.

Byo Nkafika ku mukola pampelo ya juba,
Ne lubesha wa bulanda bwapelako wapupa;
Kukekala Muntu umo na kupembelela
nkumweshwa jishinda,
Kechi kabuka Yodano buke ne.

Kechi kabuka Yodano buke ne,
Yesu wafwile ke mfuto ya bubi bwami bonse;
Byo Nkamona fishi, Ukapembelelanga ami,
Kechi kabuka Yodano buke ne.

¹⁷⁷ Nasaka kumuyuka Aye ponka pano. Tolai kuboko kwami, Nkambo wawama, tangijilai, ndekai ngimane. Ndekai ngimane pano, Nkambo, kwimena kyonse kitelwa mba kyaya mingi, bintu byonse bimweka kuya mungi. Amiwa kechi natako muchima ku byaamba uji yense ne, ndekai ngimane, Nkambo. Inge Nauba byonse byo Nakonsha kuuba, kwashai kwimana. Ntolai kuboko kwami ne kupishamo mu kiky, Nkambo. Ubaipo kintu kimo, ndekai ngimane. Inge bintu byonse byaiya, ne bya bunoshi bwa inontanda ne byonse byalengwa kabiji ne buwame bwabyo; mpofulai meso ami kubibye, lekai amiwa na Mumone Aye wafwijile. Inge kyakonsha kundengela kubulwa mulunda yense ye Njinaji, inge kyandengela kubulwa bintu byonse byo Njinabyo; akyo kechi kilumbulula kintu nangwa kimo ne, Napana byonse pakyakusokelapo bitapisho. Byokiji, lekai ngimane walukokelo. Kabiji juba jimo mwela wakupema ke-aye kufuma ku kilungi kyami, kabiji Nkayuka mba mweo wami waya ne moba ami apwa, kabiji kimye kyami kyafika kabiji ne kitupa kyami kyafumishiwa pokikala, Amiwa kechi kabuka Yodano buke ne. Aye ukekala konka. Ee. Byo Nkamona fishi, Ukapembelelanga ami, Kechi kabuka Yodano buke ne. Inge Nakonsha kwimana kulubaji Lwanji pano, Aye ukemana kulubaji lwami kyokya kimye. Amiwa nkekela Aye Yeka wafwijile, bumi bwami bukekala bwalusekelo. Ajo jo jishinda jo nkeba kwimenamo.

¹⁷⁸ Naketekela mba muji bantu bakolwa muno. Bushe waji kupana bitupa nyi? Nalubamo. Bushe baji kupana bitupa nyi? Kujipo bitupa byobapana nyi? Pajipo uji na bitupa bya milombelo nyi? Ine.

¹⁷⁹ Amiwa mbena kupembelelatu Mupashi Wazhila. Inge mwakonsha kuketekelatu, ikalaitu na lwitabilo, ne kuzhinauka ne. Inge Lesa wasolwela makatazho obe . . . Nangwa kyamusango ka, Amiwa kechi nayuka ne; inge wakonsha kusutula kuboko kobe, amiwa kechi mwanjyuka ne kabiji ne Amiwa kechi ne muyuka ne. Nanchi inge Lesa wasolola muno, mwakonsha kuketekela mba ke Malaika umo yeka waletele Mbilala konaunwa kasa kukyanygye kufika kokwa ne, kyakonsha kwikala Malaika

umo ubena kwikileta ponka pano konaunwa kukwabo kasa kukyangye kufika. Mwakonsha kwikiketekela kyo nyi? Inge wakonsha, sutulai kuboko kwenu. Kijitu bulongo. Kijitu bulongo, lekai aye Nkambo ekiswishe.

¹⁸⁰ Aye waikala pepitu ne amiwa. Kuji mukwabo waikala pepi ne amiwa, ke Mrs. Snyder, nangwa yuwe Mrs. Murphy papo, jizhina jaji byo jiji, waikala ponka po. Amiwa ne bayuka.

¹⁸¹ Amiwa kechi namuyuka awe mwanamulume ne, aye kemwenyi kwi amiwa. Bino Lesa wamuyuka. Inge Lesa wakonsha kwi jisolola ponka pano, baanga ba mwianweba bayuka mba kechi . . .

¹⁸² Kechi mutale pe amiwa ne. Ami, Amiwa ne mwina Kentucky wayukanyikwa bulogo, inge mwayila kulondela kyokyo. Ami—Ami kechi nafunda bulongo ne, kafwako, kya—kya kunembatu jizhina jami. Bino kujipo kintu kimo kyo Nayuka, Aye Namuyuka. Kabiji akyo, kyo—kyonka kyo Nataka muchima kuyuka. Pano, kechi—kechi muteko muchima ku ng'ambilo yami ya mulaka ne.

¹⁸³ Kabiji mwakonsha kulanguluka mba busapwishi bwami lukeelo luno bwajinga bwabula mundonda kabiji ne bintutu byonse, anweba butachikaitu na Baibolo pa kimye kimo kabiji mumone kana kechi muji ponka ne. Monai kana milanguluko yenu kechi ibena kutwelamo ne inge mwiyebika—inge mwiyebika ponkapa. Kechi mwibyesakanye pamo na milanguluko yenu ne, pakuuba byesakanyai na byo aamba Aye. “Twelai pa kibelo kyakepa, ne jishinda ja kepa, kabiji bo bacheche bejimana; mambo jishinda jabaya jitwala ku lonaiko, kabiji kibelo kyabaya, kabiji bavula bakaya mu kyokya kifulo,” mamilyoni ama milyoni bo bakayamo. Umotu pa milyoni umo kape mo mujishinda mo kikeshila. Abyo byokiji. Abyo byobyoyo Aambile. Pano, Aye kechi wapainepo nambala ne, bino Waambile mba, “Byonka byo kyajinga mu moba akwa Nowa, amo mwajingatu myeo eiti. Byonka byo kyajinga mu moba a Sodoma, basatu.” Kufuma mujibumba jonse, basatutu bapulukile, mu mujilo. Nanchi byobyoyo kikekala!

¹⁸⁴ Pano, inge uji yense kine wa bumupashi, Nasaka namba anweba mutale pa yuwe muntu waikala papo, aye ubena kwatwajijilatu nakuutala. Wasutula kuboko kwanji, Amiwa kechi na muyuka ne; kechi na kimumonapo kala ne, kabiji kafwapo nangwa kimo kyo nayuka pe aye ne. Aye waikalatu popa kasa abena nkutala. Bino, monai, aye ubena kunkumanya, ubena kulomba. Bino, abyoyobyoyo. Pano, inge Nkambo usakumbula . . . Awa mwanamulume waikala popa palepa kufuma kwi ami, kabiji aye yo mbung'eno itanshi, kabiji waikala popa. Inge Nkambo usakusolwela byo aji—byo aji . . . Amiwa—Amiwa kuuba namubuka ne. Ami kuuba nauba ne, Amiwa kuuba nauba kyokyo ne, mambo Lesa wikyuba kala. Bino

kyakonsha kubaisha Iwitabilo Iwenu. Muntu yense wamona pano, Aye uji ponka pano, ye Mupashi umotu. Kabiji vulukai, Yesu walaile kikye, kimye kyakumpelo kasa kikyangye. Kimye kyonse kyo kiyukilo kipelako.

¹⁸⁵ Juba jikwabo, Leo ne Amiwa twaikele mu mukwakwa, kabiji ne atweba bamo twaambilenga. Kabiji Natwajijiletu nakumvwa mba kuji lupipu lubena kwiya, lupipu lubena kwiya. Umvwe twikyamba, kechi kikekala lupippu mu nyingijilo yami ne, mambo kuuba yakilapo ne, bino kikekala lupipu mwi amiwa. Amiwa kimye kyonse mbena kuyatu na kukooka kabiji ndekatu bantu kasa batangijila ne kumbula byakuba, kabiji ne kutuma mu *jije* jishinda kabiji ne *joja* jishinda. Inge Naubile kintu kimo Nkambo kyo ambuujile kuba kimye kyapita kunyuma, Amiwa inge kechi nji mulukatazho lo Njinalo leelo ne. Amiwa kafumapo mulungu ubena kwiya pakuuba mba kekale buke na Lesa. Ee, mwane. Na—Nafwainwa kumvwa kufuma Kwiulu. Amiwa kechi mbena kukeba kwikala wakokelela ne, Nafwainwa kwimana pa byo nashininwamo.

¹⁸⁶ Awa mwanamulume, Kyatwajijilatu na kubwela kunyuma kwi aye, aye waikala kunyuma, mambo awa mwanamulume waketekela, aye kine waketekela. Mbena kukeketa konse konse mujibumba, kabiji Kibena kubwelatu na kuponena kunyuma pa mwanamulume. Aye uji na kyakukabila, uji na kinemenezhi, bino uji na kinemenezhi kya muntu ungi. Abyo ibyo. Ubena kulombelela muntu ungi. Uji na muntu umo pa muchima obe. Abyo ibyo, kechi ibyo nyi? Ke mutemwe. Inge Nakonsha kukubula lukatazho luji na mukwenu, usa nkuketekela mba ne kalume wakwa Lesa nyi? Ke bukyakolwa. Abyo ibyo. Inge abyo ibyo, sutula kuboko kobe.

¹⁸⁷ Waketekela nyi? Muntu umo papo wajikusutula kuboko kwanji, mwanamukazhi kunyuma kukwe, muntu umo. Ee. Ee. Obewa kechi wanyuka nenyi? Amiwa ne mwenyi kwi obewa nyi? Amiwa kechi nakuyuka ne, bino Lesa wakuyuka. Waketekela kyokyo nyi? Inge Lesa usakusolola kwi amiwa kiji mu muchima obe, usa kuketekela mba ne kalume Wanji nyi? Inetu wakepa mubiji, kyo wakatazhiwa nakyo ke mwaana kokwa. Abyo ibyo. Kabiji mwaana uji na musongo wa pa kikoba pa kilungi. Dokotala kafwako kyo akonsha kuuba pa kikye ne. Obewa wi mwenyi kuno, obewa ne mutemwe obe waikala popa. Waketekela mba Lesa wakonsha nkumbula byo uji nangwa ko wafuma nyi? Wiikiketekela nyi? Mwakonsha kuswa lubuko lwa mwaanaminge Aye wakonsha nyi? [Aye inetu waamba mba, “Ee.”—Waku.] Kijitu bulongo, wakonsha kubwela ku Somerset, Kentucky, koowafuma. Kabiji ketekelai mba usa kwikalatu bulongo, awa musongo wapa kikoba usa kumuleka mwaana inge wakonsha kwikiketekela.

¹⁸⁸ Byo Najikutongola akya kyambo, muntu umo waimana kunyuma kokwa mu kishimikwa, kufuma ku Somerset,

Kentucky, wajikulombanga, na lukatazho lwa muchima. Anweba mwaketekela mba Lesa usa kwibabuka nyi? Inge wiikiketekela na muchima obe yense, ne kuketekela mba Lesa usa kumubuka kabiji ne ku mulengela kwikalatu bulongo.

¹⁸⁹ Kuno, kuno, Naketekela mba muntu umu wajikwiyatu bulongo muno, bulongotu, inetu. Ee, Najikumona kuboko kobe. Amiwa Ne mwinyi kwi obewa, inetu nyi? Amiwa kechi nakuyuka ne. Kechi twakikumanapo kala ne. Wanketekela mba ne kalume wakwa Lesa nyi? [Aye inetu waamba mba, “Ee.”—Waku.] Waswa nyi? Uji na kisendwa pa muchima obe, nangwa kintu kimo. Obewa waketekela inge Lesa wakonsha kwiiikisolwela, Mwikiketekela mba ye Mupashi umu yenka wajinga mwi Kilishitu? Mulume obe waikala popa, aye waketekelatu kintu kimo, nanji? Mwakonsha kuketekelatu kintu kimo? Ke kya songwakazhi obe wamuचेचे waikala pepi ne obewa popa. Abyo ibyo, uji na kaasa. Bino anweba mwaketekela mba Lesa usa kumubuka nyi? Inge byo mwauba, sutula kuboko kobe. Kijitu bulongo, bika kuboko kobe pa mwaana.

¹⁹⁰ Nkambo Yesu, mu Kyeenyi kya Mupashi Wenu, Nazhachisha jabola ubena kwipaya mwaana. Nabika, konka kulwitabilo, Mashi akwa Yesu Kilishitu pakachi ka ubena kwipayang’ana ne mwaana. Mulekai ekale na bumi. Amena.

¹⁹¹ Ikalai na lwitabilo mwi Lesa. Kechi muzhinauke ne. “Inge mwakonsha kuketekela, bintu byonse byakonsheka kubiwa.” Inge mwakonsha kuketekela, bintu byonse byakonsheka. Byonkabyotu.

¹⁹² Muntu umu mukwabo kunyuma kokwa wajikusutula kuboko kwabo, pantu pamo, obewa, inetu popa kwapela. Obewa waketekela mba amiwa ne kalume wakwa Lesa nyi? Amiwa kechi nakuyuka ne, noobewa kechi wanyuka ne. Waketekela mba Lesa wakonsha kumbula lukatazho lobe nyi? Wakonsha kuketekela Yesu kwikala Lubuko lobe nangwa Umwena, musango yense mo kyaikela—musango yense mo kyaikela...? Pano obewa wiikiketekela nyi? Kijitu bulongo, nanchi akwa kuzakama ko wajinga nako, kyokyo wajinga nakyo. Inge akyo kijitu bulongo, imana, inge akyo byokiji, pakuuba mba bantu bamone mba kya bukine. Kijitu bulongo, kisa kukuleka pano. Yanga ku nzubo ukekale bulongo. Lesa emupeshe.

Obewa wafuma ku Kentucky, ne obewa. Uu-uu, abyo ibyo.

¹⁹³ Awe inetu walondelapo kwikala kwi obewa wafuma ku Kentucky, ne aye. Ne aye, pamo. Amiwa kechi nakuyuka ne, Nakuyuka nyi? Bino Nakonsha kukubula mba uji na kintu kimo kyatama ne obewa. Inge Nakonsha kukubula kyatama kwi obewa, umuswe Yesu mba lo Lubuko lobe nyi? Kiji pa jimwata jobe. Inge akyo kiji bulongo, sutula kuboko kobe, peulu peene pakuuba mba bantu bakumone. Kijitu bulongo, yanga ku

nzubo pano, kisakupwa. Lwitabilo lobe lwa kulengela kwikala bulongo.

Nakukambizha mba wikale naluketekelo. Nakambizha lwitabilo lobe luketekele.

¹⁹⁴ Apo paikala inetu papo, ubena kulomba, uji na kakitambala pa kilungi kyanji. Amiwa kechi nakuyuka ne. Lesa wakuyuka. Obewa wafuma ku Joliet, Illinois, kabiji uji na kitumbwa tumbwa. Abyo kine ibyo. Mwakonsha kukumya... (Ee, awe—awe ye mwanamukazhi waletete Rosella. Abyo ibyo. Pembelaiko, aye wambujile pa kyokyo, bino kechi wayukile mba Amiwa namuyuka mwanamukazhi ne. Abyo ibyo. Kyamwekatu nobe lwitabilo lwa mwanamukazhi lwabaya bingi.) Amiwa nsakwimubula kintu kimo anweba—anweba mwayuka mba kechi Namuyuka ne. Anweba mubena kulombelela yuwe mwanyike waikala papo papelela kipona, wakolwa. Ao ke mwaana obe. Abyo ibyo. Amena. Anweba mwayuka mba Amiwa kechi nayuka kyokyo ne.

¹⁹⁵ Abyo byo Kiji, Ke aye Mupashi Wazhila! Bushe obewa Wikiketekela nyi? Wikitaba Kye nyi? Nanchi inge akye kiji bulongo, kyo Najikwamba kya “kutwela pa kibelo kyakepa, kabiji ne jishinda jakepa” kiji bulongo. Yesu Kilishitu, Mwaana Lesa, uji ponka pano. Aye Mupashi wa kwa Lesa mumi uji monka muno. Bushe obewa Wikiketekela nyi? Nanchi, pakuuba anweba myuke mba Amiwa kechi ne muntu ubuka ne, Amiwa kechi ne ubuka ne, pakuuba Mupashi wakwa Lesa wasajiletu amba emwesheshemo Ayemwine. Amiwa kechi nafunda ne. Amiwa kechi njipo na maana a kintu nangwa kimo ne. Pakuuba ke Mupashi Wanji wiikyuba, mwamona, kabiji Aye ubena kukeba mba muyuke mba Nemubula bya Bukine.

¹⁹⁶ Abwe bo Bukine, bwakwamba mba Yesu Kilishitu wiimulenga kwikala batutulu anweba bonsetu lukeelo luno inge mwakonsha kuketekela kyokyo. Pano nobe byonka... Inge Kyaingijile mu Kingston, amo bamishonyi, nangwa uji yense kokwa kunyuma, Wiikimwene kwingila mu Kingston, masauzande kutambula lubuko, kika kyo Kyakonsha kubula kwingila muno mu uno America amo motuji nayuwe musango pa kino kimye? Kika kyo twakonsha kubula kwikiketekela? Mambo kechi twakonsha kukiluka kuzhikulwa kwa buuku wamucheche kokwa ne. Mwikiketekela kyonyi? Sutulaiko maboko enu.

¹⁹⁷ Pano, ao onka maboko amotu, abikai pa muntu umo uji pepi ne obewa, lekai na mulombelele amiwa kuno, kabiji kwikala na luzhinauko mu muchima obe ne, akye kisakwikipwisha.

¹⁹⁸ Oo, ami, Mulongo Neville! Byo Nakonsha kutemwa, byo Nalomba, byo Na...Anweba mwakonsha kulanguluka mba Amiwa kechi ne mututulu ne; Kechi njibyobyoye ne. Amiwa nayuka Ponji. Inge Nakonsha kwimupatu kikye kintu kicheche kwi anweba! Mwavuluka mba Yesu Kilishitu, Mwaana wa Lesa,

muno mukachi ka bantu lukeelo luno, ponka pano, uji pano pa kyonka kino kimye, kasa abena kwimweshwa Ayemwine?

Kyawama, mwaamba mba, “Mulongo Branham, *obewa* waji kwamba kyokyo.”

¹⁹⁹ Nanji kwi Kyamba byepi? Amiwa kechi nakuyuka ne. Kuji mukwabo mwanamukazhi uji na TB. Obewa wabukwa, nyenga. Upeshiwe. Nalomba lulekelo lwa mambo, wajikulombelelenga mwanamukazhi uji na TB, mambo ke mwanamukazhi wa mutwe-wawwi. Ee. Kijitu bulongo, kiketeteletu. Kijitu bulongo. Aye ujipano. Ke Kyeenyi Kyanji.

²⁰⁰ Bino, abye Aye byobyoby aambile, “Abye biyukilo bikebalondelanga baitabila. Inge babika maboko abo pa bakolwa, bakakosa.” Wakonsha Kubepa byepi? Mwamona, kechi kiji pe Aye ne, kechi kiji pe ami ne, pano kiji pe obewa. Pano waketekela.

²⁰¹ Mbena kutala pa mwanamukazhi wachepa mubiji waikala kunyuma kokwa, uji bingi na lwitabilo. Aye ne balume banji baiyatu katataka kwi Nkambo. Aye waikala monka muno mumpwijilo, wajinga na kyobakebelenga badokotala kumutumbula pano kasa bakyangye, kabiji mwananji wajinga mukusemwa. Kabiji badokotala bafwajilwe ku mutumbula palutwe, bino mwaana byo asemekelwe kechi batainemo kitumbwatumbwa ne. Kyonse kyaya. Mwamona? Kika? Aye waikalatu nobe. . . Aye kechi wajinga kuno ku pulatifomu ne byonka byatu. Wajikwikalatu kunyuma kasa aketekela. Ibyo nyi, Mrs. Green, Naketekela byokiji, kunyuma koko? Abyo ibyo. Mwamona kuboko kwanji? Badokotala kechi bakonsha ne kutana kitumbwa ne, kyonse kyaya. Kika? Aye wajikuketekela, wajikulekatu ne kwamba mba, “Kiji bulongo!”

²⁰² Pano ne anweba ubai kintutu kimo, kabiji kumanyikwa konse komujinako kusa kufuma pe anweba. Lesa, Ao wakonsha—Ao wakonsha kutuma Kintu kimo mu mubiji wa muntu, ku kyokya kya kusumwa ku muloolo mukatampe ao wajinga mukulu kwa muntu, na kupana bulembe, amba afwe, kabiji wibikanya kwenda ne kwibyonauna, pano ibyepi kukilapo Aye byo akonsha konauna misongo iji mu mubiji obe. Mambo, awa muntu wajinga mukajilwa kabiji wakebelenga bukwasho. Anweba mwafwainwa, ne anweba pamo. Inge kechi mujinalo ne, mufwa.

²⁰³ Pano twajijilai kubika maboko enu umo pa mukwabo. Kechi mwilombelele anweba bene ne, lombelelai muntu ye mwalamakana nanji. Ao ye musango wa-Bwinakilishitu.

²⁰⁴ Fundai kikye, fundai kikye, amba, monka mo mubila ku bakwenu, muba kwi Kilishitu. Inge mwauba kyawama ku muntu mukwabo, anweba mubena kwikala bawama kwi Kilishitu. Inge mwabula kuba bulongo ku muntu mukwabo, anweba mubena kubula kuba bulongo kwi Kilishitu. Oo, ami!

205 Oo, inge Nakonsha kupana kikye kyaikala kyatwajijila, inge Nakonsha kulengela bantu kwi kimona, kika kyo Mbena kutalapo kabiji ne byo Mbena kumvwa, kabiji ne byo Nayuka bibena kubiwa, monai. Aye Kilishitu byo abena kulondaizha yoya Mbila lukeelo luno, kuuba mba itwele mu michima ya bantu kabiji ne kubapo kintu kimo moomwa; kechi kisangajimbwe ne, kechi byakumvwa ku mubiji ne (biyatu nakyo), pakuuba kulengamo lwitabilo lubula kufwa moomwa bubula kwamba mba, bupane mpuzha ku mulwany ne.

206 Pano, Aye usa kumvwa milombelo yami, Aye usa kumvwa yenu. Anweba ilombelelai anweba bene nabene, mu kimye kyo Mbena kulombelela anweba bonse.

207 Anweba Nkambo, kino kimye kyakatazha, twavuluka mba akye kiji na kilumbululo pakachi ka lufu ne bumi, ku bavula. Kabiji Amiwa mbena kuzakama mu Kyeenyi Kyenu, mambo Nayuka, Nkambo Lesa, amba Nafwainwa kulomba na muchima wami yense. Navuluka mba kape kechi kwakonsha kwikalapo nangwa umo mulwazhi mukachi ketu mu mamineti faivi asakulondelapo ne, amba muntu yense muno avuluke mba Anweba muji muno. Bano baimana lukeelo luno, Nkambo. Lekai bantu basutuleko mamboko abo bajikuyuka mba Amiwa kechi ne bayuka ne, kabiji kafwapo nangwa kimo kyo nayuka pe abo ne. Bino Mupashi Wenu wayuka byonse. Anweba mwayuka byafyamika bya mumichima yabo, pano ibyepi kukilapo Anweba byo mwayuka bya lumanamo byabo kabiji ne makatazho abo! Pano, Nkambo, kilekai kikale leelo, lekai kikale ponka pano amba Mupashi Wenu usa kukwata mibiji yabo yokolwa. Kiswishai kye, Nkambo. Abo babena kwilombelela abo bene nabene.

208 Kabiji Nalomba, Lesa Mutemwe, amba Mupashi Wazhila usa kwikilengela kikale kitutulu kwi abo, kyakuuba mba kechi bakonsha kubula kwikiketekela jibiji ne. Kabiji kujipo ne misongo ikwabo, Nkambo, ayo yakijishatu kubaya kukila pa iye ya kumubiji, ke misongo ya bumupashi. Lekai muchima yense ashikuke.

209 Nkambo, kyakonsha kwikala byepi mba Anweba mwaimene kokwa ku lubaji lwa kwa Abulahama, kabiji mwaubile kikye kintutu kimo, mwabujile Sala ao wajinga “kunyuma” Yenu, Kinembelo kyaamba mba, “mutente mukachi wasekele,” kabiji Anweba mwamwambijilemo. Kabiji Abulahama wayukile mba aha wajinga Elohimu, awa Lesa mukatampe. Mu maminetitu aacheche Anweba mwazhimang’ene kufuma ku meso anji.

210 Kabiji, Nkambo, Yesu byo aimene wauba kintu kimo, kabiji waambile mba, “Anweba mutela Abulahama amba ‘shenu,’ kabiji mwamba mba mwayuka Binembelo.” Waambile mba, “Anweba muya mungi, mambo akubula kuyuka Binembelo

“nangwa Bulume bwakwa Lesa.” Kabiji Aye ba mutelele mba “Belezebabuba.”

²¹¹ Bino Anweba mwalaile mba mu moba akupelako Muketulwila Mupashi Wenu jibiji. Aye ngauzhi waambile mba, “Mu kimye kya mabaanga abufuku ku kekala Kyeya.” Kabiji tuji pano.

²¹² Mukimye inontanda yabula shabo ibena kuzakama mu bubi, nobe muntu wapendwa ubena kuteleteta kuya kunzubo bufuku, katatakatu ikasasaulwe mukachi, kechi kukashalapo nangwa lukungu lwakufuma mu mushiji ne, nangwa pachechetu ne, bikashalapo pe akyo. Kabiji tubena kumona kimye kasa kibena kuya na kupwa.

²¹³ Anweba Lesa, fumyaimo luzhinauko lonse mwi atweba. Tutwalai mukizhingu ponka pano. Iyai, Mupashi Wazhila. Kwachijilai byapi byenu Byenu, fukaminai pajije jibumba jicheche ja bantu ponka pano, kabiji muleke Anweba bene muyuzhiwe mu michima yabo, kabiji mwibaleke bayuke mba Anweba muji Mukyeenyi kya Bulesa, amba ye Anweba, “Amiwa yami Yehoba Upwisha bikola byobe byonse.” Kabiji lekai Kyeenyi Kyenu kyubepo kintu kimo mu michima yabo akyo kisakwibalengela kufuma muno, lukeelo luno, kasa baketekela na byonse biji mukachi kabo. Kabiji lekai yense wakolwa ne wamanama abukwe.

²¹⁴ Nobe, wamwingilo Wenu, Naimana na kuzhachisha diabola yense, kuzhachisha misongo yonse, kuzhachisha Satana.

²¹⁵ Obewa washindwa, kabiji kafwako byo uji ne wiwabubelatu. Kabiji twaita kuboko kwenu pa kikye lukeelo luno, mu Jizhina ja Yesu Kilishitu. Kabiji nobe wamwingilo Wanji, usapwila Kyambo Kyanji ne kubula bantu bya Bukine, kuuba mba bololwe ne kuya mundonda ya Kyambo kya Lesa, Nakuzhachisha, Satana, mu Jizhina ja Yesu Kilishitu. Fumamo mu babo bonse bantu bafuma kwalepa ne pepi, kuuba mba babukwe. Obewa fuma mujino jibumba kabiji ne babo bantu. Nakukambizha obewa mwi Lesa mumi. Kabiji Baibolo waamba mba, “Yabulume, milombelo ya muntu waoloka yakila mu mingilo yo ingila.” Kabiji bavula bantu baoloka babika maboko abo pa bakolwa, lukeelo luno muno. Oo, Satana, ubena kukeba kwibalengela kulanguluka mba kyajinga amiwa, apo nishi wafumya lukumo pe abo. Pakuuba ke lwitabilo lwabo mwi Lesa, ne alo, baketekela Lesa! Kabiji obewa usakufumamo, konka kulwitabilo lwabo. Nanchi tola lwendo lobe kufuma muno, kabiji uyenga mu fishi mo utanwa. Nakuzhachisha, mu Jizhina ja Yesu Kilishitu, na luusa lwa Baibolo wakwa Lesa, mwingilo wami ye na mpewe na Malaika. Pano yanga, mu Jizhina ja Yesu Kilishitu, kabiji baleke bekale bakasuluka. Amena.

²¹⁶ Mwaketekela nyi, michima yenu yonse, amba mwatambula lubuko? Sutulaiko kuboko kwenu, ne kwamba mba, “Amiwa

pano na mutambula Yesu Kilishitu kwikala wa Kumbuka. Byonse byaluzhinauko bya fumamo mwi amiwa. Amiwa pano Aye namutambula mukuyula kwa bulume Bwanji, mu mapesho a Kyeenyi Kyanji. Namutambula Aye.”

Lwitabilo lwami lubena kutala kwi Anweba,
 Anweba Mwaanamukoko wa pa Kalvali,
 Mupulushi wa Bulesa;
 Pano ng'unvwai mu kimye kyo Mbena
 kulomba,
 Mfumyai bubi bwami bonse,
 Nangwa kundekelela ngye mungi
 Kufuma kwi Anweba ne.

Pano twayai tusutule mambo etu na buwame kwi Aye.

Kimye bumi bwami kyo Bubena kwenda
 mumashinda avula afinshi,
 Kabiji bulanda bwazhokoloka ami konse
 konse,
 Ikalai Anweba Tangi wami (Anweba Lesa!);
 Fumyai finshi ja leelo,
 Fumyai bulanda, ne moyo,
 Nangwa kundekelela ngye mungi
 Kufuma kwi Anweba ne.
 . . . lusa lukatampe!



TWELAI PA KIBELO KYAKEPA KDE59-0301M
(Strait Is The Gate)

KIPWILO NALUFUNJISHO LWALONDANKANA

Ino Mbila na Mulongo William Marrion Branham, yalupwilwe patanshi mu Kizungu pa Mulungu lukeelo, Kisaka 1, 1959, pa Branham Tabernacle ku Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org